

مِسرِحيّة

الخمّارِينَ

أحد شمس الدين الحجاجي




المؤسسة المصرية للكتاب

١٩٨٨

ای کفنا در طبع
سیر فوارد الجنا

مع لکهای
کمالی
۱۴۹/۳

کتابخانه



الاخراج الفنى : محمد قطب

شخصيات المسرحية

- ١ - جمال بك : ضابط المباحث ٠٠ في الثلاثين من عمره
- ٢ - عبد الستار : شاويش في مركز البوليس
- ٣ - أيوب : حارس المقبرة وحفار قبور النجع ٠٠ في السبعين من عمره
- ٤ - الشيخ محمد أبو أحمد يونس ٠٠ شيخ البلد ٠٠ في الخمسين من عمره
- ٥ - أم أحمد : زوجة الشيخ محمد
- ٦ - فوزية : ابنة الشيخ محمد
- ٧ - عليان : ابن عم الشيخ محمد
- ٨ - الحاج عبد الظاهر : ابن عم الشيخ محمد
- ٩ - خليل أبو حسين : ٠٠ من أبناء القرية ٠٠ في الخمسين من عمره
- ١٠ - هنيه : بنت خليل أبو حسين ٠٠ تقوم بدورها الممثلة التي تقوم بدور فوزية

- ١١ - زوجة خليل أبو حسين
١٢ - حسن : ابن أخو خليل في العشرين من عمره
١٣ - عبد ربه أبو السعود الحشاش : من أثرياء النجع ٠٠ في
الخمسين من عمره
١٤ - عليوه : أخو عبد ربه ٠٠ في العشرين من عمره
١٥ - علي
صابر
عياد
حسنين
١٦ - زهيرة : قابلة

الفصل الأول

ملحوظة للمخرج :

من الخير أن يقسم المسرح الى ثلاثة أقسام :

• الأول : وهو واجهة المسرح : محطة السكة الحديد

والثاني : وهو المقبرة على اليمين ويسارها فراغ

والثالث : وهو مكتب ضابط المباحث

المنظر الأول

(تفساء الأنوار عن مقبرة وقد ظهر الضوء فيها باهتا مصفرا
متمركزا حول شاهدين لقبرين حديثين متباعدين قليلا ، بينهما
شجرة صبار وشجرة سنط . يقل الضوء تدريجيا كلما ابتعد
القبران والريح تعوى وتهز الشجرة . يقدم من ناحية الفراغ الأيسر
شخص يتقدم بغطى بطيئة ، كلما اقترب من القبر تظهر صورته .
وقد غطى عمامته بشال بنى ... الريح تزداد عواء مع خطواته ..
يحمل عصاه بيده دون أن يجملها تلمس الأرض . يقف أمام
أحد القبرين وقد ظهر الحزن واضحا عليه .. يجلس فيسند عصاه
بجواره ، ثم يضع يديه على وجهه والريح مازالت تعوى ، يحنى
رأسه .. يسمع صوت قادم من الظلام مختلط بصوت الريح) .

- مين اللي هناك ؟

(يظهر ضوء يقطع الظلام البعيد ويظهر صاحب الصوت
عجوزا يبدو من مشيته ضعف بصره يحمل فانوسا في يده
اليسرى بينما يحمل فأسا في يده اليمنى . وقد لبس صديريا
تحتة قميص طويل يظهر منه السروال وحذاؤه مترب قديم .
يقتررب صوته)

- مين اللي هنا ؟

(الرجل الجالس لا يتحرك بينما يقترب القادم منه)

- مين اللي هناك ؟

(يرفع الرجل رأسه فيراه القادم)

– مين خليل أبو حسين ؟

خليل : أيوه ياعم أيوب

(يضع الفانوس فوق شاهد القبر) :

أيوب : أيه اللي جابك في ساعة زى دى يا خليل ؟

خليل : أمر الله

أيوب : الناس متزرش الجبانة بالليل وفي الساعة دى ايه اللي جرى ؟

أيه اللي جرى يا خليل ؟

خليل : الليل عندى بقى نهار ٠٠ ماعدتش بافرق ياعم أيوب بينهم

أيوب : الخماسين شايفه شغلها اليومين دول وعامله عمالها الليلة
دى ٠٠ مش كنت تقعد في البيت الليلة أحسن لك ٠

خليل : المكان ده بيشدنى قوى ٠٠ باشعر انى هنا في بيتى ٠٠ بعد

ماتحول البيت لقبر ٠٠ ادخل فيه ٠٠ ملاقيش بنتى هنية ولا

امها ٠٠ بحس انى لازم أروح لهم ٠٠ شوف ياعم أيوب هنيه

هنا ٠٠ وكان يمكن تكون في بيت عدلها بازورها فيه ٠٠ رأمها

برضه هنا وكان يمكن تكون مع بنتها في بيتها ٠٠ يا عم أيوب

همن هنا ٠٠ وتقل لى ليل ٠٠ وتقل لى خماسين ٠٠ أنا لعدت

حاسس بليل ولا بخماسين ٠٠

(الريح تعوى) ٠٠

أيوب : تعالى يابنى ٠٠ تعالى في عشتى ٠٠ اقعد ٠٠ استريح شويه

٠٠ وبلاش تقلب المواجه ٠٠ دى المواجه تهد ٠٠

(الخماسين يزداد عواؤها والفانوس يسقط على الأرض) ٠

خليل : فين هيه الخماسين ٠٠ ؟ أريتها تقلعنى وتقلع جذورى ٠٠

أيوب : يا بني تعالى (يحمل الفانوس ويتحرك)

تعال ٠٠ تعالى ٠٠ خليها على الله ٠٠ وسلم أمرك الله ٠٠ هو
وحده حينزل عليك السكينة ٠٠ الموت في أوله صعب ٠٠

خليل : روح أنت ياعم أيوب

أيوب : شوف يا بني الجبانة الطويلة العريضة دي ٠٠

(يشير بأصبعه بحركة نصف دائرية حول الجبانة)

أهو أنا حافر نص قبورها والنص الثاني أبويا الله يرحمه
حافرها ٠٠ الموت مش مخلي حد ٠٠ كل الناس حتدفن ٠٠
وكل الناس حتموت وأنا حدفنهم ٠٠ واللى مش حدفنه ابني
حدفنه بعدى ٠٠ يللا يا بني يللا ٠٠ الريح شديدة قوى عليه
انهارده ٠٠ كان لازم أحفر قبر دلوقت ٠٠ لكن مش قادر م
الخماسين ٠٠ ياللا تعالى معايا العشة أعملك شاي ٠٠

خليل : روح أنت ياعم أيوب وسبني في حالي ٠٠

أيوب : حال ايه يا بني ٠٠ انت واقف هنا متصور ان وقفتك لها قيمة
٠٠ مفيش حد هنا حيكلمك ٠٠ أنا ليه خمسين سنة محدش
فيهم كلمنى ٠٠ في الدنيا يتخانقم ٠٠ هنا بيدخلوا في بعض ٠٠
بيتحللوا مع بعض ٠٠ بيدوبوا في بعض ٠٠ ماتقدرش تفرقهم
من بعض ٠٠

(يمسك بحفنة من تراب الجبانة)

الكل بيبقى تراب ٠٠

(يترك التراب يسقط من يده قليلا قليلا)

تعرف دول يا بني ٠٠ حتقول تراب ٠٠ دول يمكن يكونوا

شخصين ٠٠ صدقنى شخصين ٠٠ يا حبان ٠٠ يا عدوين ٠٠
انما شخصين ٠٠ تراب ٠

خليل : ايه ده يا عم ايوب ؟

(الخماسين تزداد عواء)

أيوب : أهى الريح دى بتاخذ الجثث بعيد ترميها ٠٠ يا خسارة ٠٠
انا حاسس انهم صحابى بيبعدوا عنى ٠٠ ايوه كل اللى هنا
صحابى وأهلى ٠٠ انا مبيكش عليهم ولا بحزن ٠٠ لأنهم
مش عاوزين مننا حزن ٠٠ عاوزينا نفهم ٠٠

(يسمع صوت أقدام)

خليل : فيه رجلين جايه

أيوب : لازم حد عاوزنى ٠٠ يكون فيه ميت مات ٠٠ وأهله

(الصوت يقترب ويدقق خليل السمع)

خليل : (يمسك بعصاه) استنى يا عم ايوب ٠٠ مين ؟

مين ٠٠ ؟

(يظهر شاب لم يبلغ العشرين من عمره يعمل بيده

بنديقة)

حسن : أنا حسن يا عم خليل ٠٠

خليل : حسن ٠٠ !!! ايه اللى جابك هنا ؟

حسن : دورت عليك فى كل مكان ملقيتكش ٠٠ قلت يمكن الاقايك هنا ٠

خليل : ٠٠ وايه اللى ماسكه فى ايديك ده ٠٠ ؟

(الخماسين يزداد هبوبها ٠٠ يضع شاله على وجهه ليتقى

الريح)

حسن : بندقية ٠٠

خليل : بندقية ٠٠ بندقية وشايلها ليه يا ولدى ٠٠ ؟ شايلها هنا فى الأرض الطاهرة دى ليه ؟ ٠٠ وفى أرض طاهرة والا غدير طاهرة ٠٠ دى آخر مرة أشوفك تشيل بندقية ٠٠ فاهم ٠٠ ؟

حسن : ياعم خليل ٠٠

خليل : (يلتفت الى أيوب) ياعم أيوب روح عشتك لحسن الريح شديدة عليك ٠٠

أيوب : الريح شديدة ٠٠ شديدة قوى الليلة دى ٠٠
(يتحرك بطيئًا حتى يبتعد عنهما)

خليل : ايه ياعم أيوب ٠٠ ايه ؟ ياترى أنت شايف ايه ٠٠ ؟

حسن : ياعمى ، عبد ربه أبو محمود الحشاش حيوصل دلوقتى ٠٠
أهله منتظرين حضوره فى قطر السريع ٠٠

خليل : يوصل والا ميوصلشى ٠٠ وده يخصنا فى ايه ؟

حسن : بيقولوا انه جايلك مخصوص ٠٠

خليل : وده يخصنا فى ايه ٠٠

حسن : هوه جاي ياخذ بتار عليوه أبو محمود

خليل : يا ولدى أنا مش عاوزك تتكلم فى الموضوع ده تانى ٠٠ أوعى
تتكلم فيه تانى ٠٠ أوعى ٠٠ ده أمر ملكش دعوه بيه ٠٠

حسن : ازاي ياعمى ٠٠ دول قاصدينك ٠٠

خليل : ايه يابنى الكلام اللى بتقوله ٠٠ قاصدينى والا مش قاصدينى
أريتهم يقصدونى أريت واحد من الحشاشين كان يبجى ويضرب ٠٠
٠٠ ويضرب ٠٠

(الخماسين تهب بقوة وصوته يرتفع مع هبوبها)

ويضرب .. ويضرب .. هنا

(يشير الى قلبه)

أريته يضرب كان يريحني من عذابي .. من عذابي .. أنت
يا بني مش فاهم حاجة .. ولا حاسس بحاجة .. تريحنى لو
تقفل الموضوع خالص ..

(يمسك بشاهد القبر ثم يجلس على الأرض يسند عصاه

بجواره ويضع يديه على وجهه)

حسن : ازاي ياعم .. ازاي ياعمى .. دى هنية كانت أختى وبنت
عمى وخطيبتي اتربينا سوا .. كبرنا سوا .. آه ياعم ..
آه ..

(يجلس على الأرض بجوار عمه وقد ترك البندقية ملقاه

على الأرض ويأخذ في نشيج عميق ..)

خليل : (يرفع يديه من على وجهه يتجه نحو حسن يربت على كتفه)
كفايه يا حسن كفايه .. كفايه يا بن خوى كفايه ..

(تطفأ الأنوار والريخ مازالت تعوى) .

المنظر الثانى

(عندما تضاء الاصواء تظهر فى مقدمة المسرح محطة سكة حديد بسيطة ... بها عدد من المقاعد متباعدة وعدد من المستقبلين فى أقصى الناحية اليمنى طاولة حولها عدد من الكراسى . يقف بجوارها أربعة رجال يبدو من هيئتهم أنهم من أثرياء الريف ... يغطى كل منهم رأسه بشال كشميرى لا يخفى العمامة الكبيرة . يستخدمون الشال بين حين وآخر انقاء لتراب رياح الخماسين التى مازالت تهب بشكل متقطع .

الوقت متأخر من الليل الجرسون يتحرك جيئة وذهابا على طول المحطة وهو يحمل صينية شاي) .

الجرسون : قهوة .. شاي .. جنزبيل .. قرفة .. قهوة .. شاي .. حلبة ينسون ..

(يقترب من الرجال الأربعة)

شاي يا عمدة .. قهوة ..

على : امشى يا ولد .. سيبنا ..

صابر : لا اشربوا حاجة .. أنا حشرب شاي .. ولا أقولك هات أربعة شاي ..

الجرسون : (يتركهم ويتبعد عنهم)

قهوة .. شاي .. جنزبيل ..

صابر : الليل في آخره .. والقطر لسه ماوصلش .. أنا خايف تكون
الخماسين عملتها وقطعت السكة .. ويبقى عبد ربه حبيبات
في الطريق ..

عياد : لو السكة اتقطعت كانوا قالوا .. ولو اتقطعت عبد ربه
يتصرف مش معقول ييات في الطريق ..

صابر : يا عالم اتقطعت فين .. ؟ يمكن اتقطعت في حته لافيه ناس
ولا فيها ركوبه ..

على : متقلقوش .. احنا مستنيين لحد منعرف حصل ايه .. ؟

صابر : القطر اتأخر لحد دلوقت أربع ساعات ..

حسنين : أنا حسال ناظر المحطة على أخبار القطر ..

(يتركهم ويتجه نحو حجرة ناظر المحطة بينما يرتفع
صوت الريح قليلا) .

صابر : الخماسين .. الموسم ده طولت ..

(يرفع شالته ليغطي وجهه)

يا عالم حقتنهي أمتي ..

على : شكلها كده مش حقتنهي خالص .. والله يا صابر ما باين
لهاش آخر ..

(يدخل الشيخ محمد احمد يونس من اقصى الناحية
اليسرى للمحطة لابسا جلبابا أسود (الزغبوط) ، ويديه عصا
خيزران ذات يد) .

صابر : (ينزل الشال) شافين اللي داخل ..

على : مين ؟ الشيخ محمد أبو أحمد .. ايه اللي جابه ؟

صابون : عامل نفسه مش شايفنا ..

(الشيخ محمد يجلس على كرسى يفسح يد المصا على
حافة ظهر كرسى آخر ويخرج عليه الدخان وياخذ في لف سيجارة
وبعد أن يبل أطرافها بلسانه يحكم لفها وينظر اليها .. يضمها
في فمه .. ثم يشعل عود نقاب ويشعلها وياخذ في جذب نفس عميق
منها) .

الجرسون : (مقتربا من الشيخ محمد) قهوة شاى جنزبيل (يصل
اليه) أى خدمة ياشيخ محمد .. أجيب لك قهوة .

الشيخ محمد : (يسحب نفسا من سيجارته)

سعادة ..

(يبصق على الأرض)

بس تكون قهوة أحسن أكبها في وشك ..

الجرسون : قهوة مخصوص لشيخ مشايخ البلاد

عياد : الراجل ده غريب

على : أهو حسنين جاي من عند ناظر المحطة

عياد : خير يا حسنين

حسنيين : القطر على وصول

عياد : الحمد لله

حسنيين : (يوجه نظره الى شيخ البلد) الله الشيخ محمد !! ايه اللي
جأب الراجل ده هنا ؟

على : متبصلوش قوى كده .. متديلووش أهمية .. هو طبعاً جاي
عشان عبد ربه .. هو بالتاكيد عارف انه جاي الليلة .

الجرسون : (وقد جاء بالشاي)

الشاي ياعمد

عياد : حطه على الطاولة وسيبه ٠٠ الراجل ده بيغيظني غيظ ٠٠
طب ايه عرفه ان عبد ربه جاي النهارده ٠٠ ده محدش يعرف
بكده الا احنا الأربعة ٠٠ طيب ياشيخ محمد ٠٠

على : لما ييجي عبد ربه حنأب أكبر كبير في النجع ٠٠ أيوه ياشيخ
محمد ٠٠ ان مدفعناك تمن ده ٠٠ حتدفع التمن لازم أنت
والنجع المخروب كله ٠٠

عياد : من يوم مامات عليوه والشيخ محمد بيعاملنا على اننا عدوين
ليه ٠٠ واحنا كده ٠٠ أيوه احنا عدوينه ٠

صابر : وطوا صوتكم ٠٠ احنا مش في الشيخ محمد ٠٠ أهو ييجي
المحطة يمشي من المحطة هوو حر ٠٠ احنا حنعمل له أيه ولا
هوو حيعمل لنا ايه ؟ أهو هوو زيه زى أى راجل من رجالات الحكومة
عاوز يبين الضبط والربط ٠٠ المهم محدش يبص ليه ٠٠

(يرتفع صوت الريح)

صابر : على الله الخماسين تهدأ شوية ٠٠ أنا مش هارتاح الا لما
أشوف عبد ربه قدامى ٠٠ أيوه واقف هنا قدامى ٠٠

(يطرُق الجرس معلنا وصول القطار ... يتحرك الأهالى
نحو صوت القطار تنزل جماعة منه يسلم النازلون على منتظرهم
بينما تنفرق جماعة عبد ربه في المنطة وهي تركّز نظرها على
القطار ويفيب حسنين بحثا عنه في القطار نفسه . الشيخ محمد
ينظر بامعان نحو القاطرة دون ان يترك كرسيه) .

الجرسون : (يقترب منه بالقهوة) القهوة ياشيخ محمد ٠

الشيخ محمد :

(ياخذ الفئجان ويقربه الى فمه وهو مازال ممعنا النظر الى
القطار وما أن يرشف القهوة حتى يمجهها على الأرض ويحول وجهه
الى الجرسون) .

دى قهوة يا ولد ولا رمل .. اشربها أنت ..

الجرسون : لامؤاخذه يا شيخ محمد .. الخماسين خلطت الشساي
بالتراب والقهوة بالرمل والله معارفين حتقف أمتى ..

حسنين :

(يعود من القاطرة الى أبناء عمه الذين عادوا للتجمع في

مكانهم السابق) .

أنا فتشت القطر كله مالمقيتش أثر لعبد ربه .. ياترى حصل
ايه .. ؟ أتأخر ليه .. ؟ لازم حاجة حصلت له ..

صابر : ياراجل قال الله ولا فالك .. حاجة ايه اللي حصلت ؟ هوه
عبد ربه أبو محمود تحصل له حاجة .. تلاقيه عارف أنه
متراقب فحبيجي في قطر تانى ..

حسنين : الناس كلها مشيت مفاضلش الا احنا ..

صابر : خلوا بالكم الشيخ محمد أبو أحمد جاي علينا ..

الشيخ محمد : وقد اقترب منهم (ايه يا عياد أنت وولاد عمك انتو
حتباتوا هنا والا ايه ؟ متروحوا .. كفاية كده .. ما الراجل
مجاش .. متروحوا بقه ..

عياد : فيه ايه يا شيخ محمد ؟ داخل علينا كده .. لاسلام ولا كلام
وجاي تحاسبنا على وقفنا .. ليه كده خبر ايه ؟ نقعد نمشى
احنا احرار والا ايه ؟ هوه الوقوف ممنوع في المحطة والا
ممنوع ..

الشيخ محمد : لا مش ممنوع بس بدل منتو وقفين متلطعين هنا ٠٠
اجروا روحوا لراجلكم حتلاقوه في الجبانة ٠٠ قولوا له ان
أنا جاييله ٠٠

(ينظرون اليه في دهشة وياخذون في الخروج من المحطة
بينما يقف الشيخ محمد وحده وقد أخذت الريح تزداد عواء
يرفع عصاه الخيزران الى أعلى) .

والله ماعارف حتكون نهايتها أيه ٠٠ ؟ مش شايف اليومين
دول الا المشاكل ٠٠ وأهى الخماسين مش ساكنة ومورياذا
البلاوى ٠٠ ربنا يستر ٠٠

(يعطى ظهره للمسرح وقبل أن يخرج يدخل جمال ضابط
مباحث المرتز بملابسه المدنية وبرفته أحد المخبرين) .

جمال : شيخ محمد ٠٠ شيخ محمد

الشيخ محمد : (يلتفت اليه) مين ٠٠ ؟ حضرة الضابط ٠٠ أهلا
وسهلا جمال بيه ٠٠ أنا كنت رايدلك ٠٠

جمال : لا أنت رايع ولا أنت جاي ٠٠ أنا فضلت أجيلك بنفسى ٠٠
سبيننا يا شاويش ٠٠

الشاويش عبد الستار : حاضر يا أفندم ٠٠

(يستدير ويخرج من المحطة)

جمال : أنا عاوز أعرف أنت بتهرب منى ليه ؟

الشيخ محمد : أنا ؟؟ !!

جمال : أيوه أنت ٠٠ ! أمال مين ؟

الشيخ محمد : أنا أتهرب منك ؟ ليه ؟

جمال : أنا اتسئل يا شيخ البلد ! ٠٠ ؟ أنا اللي بسأل ٠٠ وأنت
تجاوب ٠٠

الشيخ محمد : ايه الحكاية يا جمال بيه ؟

جمال : الحكاية انى أنا صبرت عليك كثير ٠٠ فاهم صبرت على استعباطك ده ٠٠ لكن أنا مش حصبر تانى ٠٠

الشيخ محمد : أنا بستعبط ٠٠ !!

جمال : وبترد على ٠٠

الشيخ محمد : أنت داخل سخن قوى يا جمال بيه ايه الحكاية ٠٠ ؟

جمال : سخن والا بارد ٠٠ متكلم كويس ٠٠

الشيخ محمد : أنت بتجرح يا جمال بيه ٠٠ أنت بتهينى ٠٠

جمال : أنت اللي بتهين القانون فى البلد دى ٠٠ وأنا عاوز أعرف منك ٠٠ أنت عملت ايه فى القضية ؟

الشيخ محمد : قضية ايه ؟

جمال : مش عارف قضية ايه ٠٠ !! ؟ قضية قتل عليه يا شيخ البلد ٠٠

الشيخ محمد : ودى حنعمل فيها ايه ؟ ٠٠ واحد اتقتل والفاعل مجهول ٠٠

جمال بيه : مجهول لى والا ليك ؟ أنا متأكد انك عارفه ٠٠

الشيخ محمد : يا بيه ده كلام كبير ٠٠ يعنى بخفى مجرم قاتل ٠٠

جمال : أنا بحذر ٠٠ القضية دى خطيرة جدا ٠٠ الباشا الحكمدار

على اتصال دايماً بالبيه الأمور ٠٠ عشان يعرفوا القاتل ٠٠

والبيه الأمور محملنى المسئولية ٠٠ وأنا شخصياً شايف ان

احنا لازم نلاقى القاتل ومش حسكت غير لما القانون ياخذ

مجراه ٠٠ أنا القانون كل حاجة فى حياتى يا شيخ محمد ٠٠

معرفش غيره ٠٠

الشيخ محمد : أنا بقة أعرف غيره ..

جمال : طبعا ما أنت مش ممكن تعرف القانون وأنت بتتستر على مجرم .

الشيخ محمد : ده كلام كبير يا جمال بيه .. كلام يودى سجون ..
جمال : طب قل لى ليه أنت بتتحرك وحدك ؟! ايه اللي جابك المحطة
هنا .. ؟ أنا بحس انك قوة خسارة عن البوليس بتعمل
لحسابك ..

الشيخ محمد : طب ليه ؟

جمال : قل لى يا شيخ البلد .. قل لى .. كل ما اعمل حاجة تعمل
عكسها .. أنا ما عرفش غير القانون وأنت تعرف غيره ..
ايه غير القانون حا يكون غير كسر القانون ..

الشيخ محمد : أنت تقدر تشتم زى ما أنت عاوز لكن متقولش كلام
أنا مقلتهوش ..

جمال : أنت مقلتش كده !! ؟؟

الشيخ محمد : أنت بتقلب كلامى ! أيوه أنا أعرف حاجة غير القانون
اللى بتتكلم عنه .. أيوه .. أعرف العدل ..

جمال : وايه الفرق بين القانون والعدل ؟

الشيخ محمد : الفرق كبير .. كبير قوى .. قوى يا جمال بيه ..

(تشتم قوة رياح الخماسين يحاول كل من الشيخ محمد
وجمال الوقوف ضد اتجاهها ، يخلع الشيخ محمد شاله ويقدمه
لجمال بك) .

خد .. حظ ده على وشك ..

جمال : (يمسك بالشال دون أن يضعه على وجهه تهدأ الرياح)
ايه الفرق !! ٩٩

الشيخ محمد : الفرق بين رياح الخماسين والنسيم .. رياح
الخماسين غربية عننا .. جاينا من قلب الصحرا .. عميه
.. بتأذى كل اللي يقف قصادها .. البيت القوي متقدرش
تعمل له حاجة .. والعشة البسيطة تهدا .. دى قوانينكم
جاينا من ناس متعرفناش ملهمش دخل بينا عمرهم ماعاشوا
في الصعيد ولا شافوه .. الصغير يتأذى منها .. والكبير فيه
ناس كبار يقفوا معاه .. الصغير ضايح والكبير كسبان ..

جمال : لا .. لا .. مش هيه دى القوانين ..

الشيخ محمد : العدل زى النسيم كل ما يمر على أرض يفرحها ..
كل ما يمر على ناس يسعدهم .. الفقير تريحه والغنى تبسطه
والمرضى تشفيه .. تمر على عشة تزغرد وتمر على قصر
يغنى .. العدالة .. ريح بحرية في يوم حار .. شمس دافئة في
يوم بارد .. يا جمال بيه .. القوانين دى بتاعتكم والعدل بتاع
ربنا ..

جمال : لا ياشيخ محمد لا .. مش ده القانون ..

الشيخ محمد : اهو احنا شايفينه كده ..

جمال : أفهمكم ازاي ؟ .. يا عالم .. أفهم الخلق دول ازاي ؟ ..

الشيخ محمد : فهم !! فهم .. زى مايعجبك ..

جمال : أنا لبقيت فاهمك ولا فاهم الأهالي .. راجل يتقتل الصبح
والسوق منصوب قدام عيون اللي رايع واللى جاى .. وكل
الناس تقول مشفناش حاجة منعرفش حاجة .. تبقى ايه
الحكاية .. دى حاجة تخوف .. تخوف والا لا .. احتمال

فيه جريمة تانى حتحصل .. لأ مش احتمال .. ده بالتاكيد
فيه جريمة تانى حتحصل .. سكوت الأهالى .. ده يبقى
عدل .. ؟ ترك المجرم من غير عقاب يبقى عدل .. ؟ وسكوتك
أنت ده يبقى عدل .. ؟

الشيخ محمد : سكوتى عن أيه .. أنت برضه بتتهمنى ..
جمال : مش ممكن يبقى فيه عدل من غير قوانين ..

الشيخ محمد : (يشعل السيجارة) الناس دى ليها قوانينها ...
اللى لازم تفهمها .. قوانينها العدل ..
جمال : (ساخرا) فهمنى ياشيخ البلد !!

الشيخ محمد : صعب تفهمها .. أنت مش واحد مننا .. أنت غريب
غريب عننا .. قوانين الناس دى متتفهمش بالعقل .. اللى
عاوز يفهمها لازم يفتح قلبه .. لازم يحس بينا .. احنا
الصاعدة اللى الناس بتنكت علينا .. لينا قوانيننا اللى
بنحترمها وبنحقق العدل بيها ..

جمال : يعنى القوانين دى تقول نسيب القاتل ويبقى ده العدل ..
الشيخ محمد : لأ متسيبوش ..

جمال : طيب ساعدنى نقبض ع القاتل ونقدمه للعدالة ونخلى القانون
ياخد مجراه ..

الشيخ محمد : وأنا مانعك ..

جمال : أيوه مانعنا بتتحرك لوحدهك .. فيه فى دماغك حاجة .. قلها
لى وأنا أساعدك .. على كل أنا بكره حاخذ أمر من النيابة
بالكشف على جثة هنية بنت خليل أبو حسين ..

الشيخ محمد : (مدعورا) يعنى أيه ؟

(يلقي بالسيجارة على الأرض)

جمال : يعنى حنحول جثتها للطبيب الشرعى يشوف هيه ماتت
ازاى ٠٠ ؟

الشيخ محمد : (يدوس السجارة بقدمه بعصبية)

لا بلاش ٠٠ متعملشى كده ٠٠ دى فضايح ٠٠ أنت حتنبش
قبر ، ودى الأهالى مش حيسامحوك فيها لو عملت كده ٠٠
الميت له حرمة ميتلعش بيها ٠٠

جمال : والقانون له حرمة وميتلعش بيه ٠٠ القانون لازم ياخذ
مجراه ياشيخ محمد ٠٠ وأنا لازم جعرف القاتل ٠٠ وحقبض
عليه ٠٠

الشيخ محمد : (مستسلما) خلاص اعمل اللى أنت عاوزه ٠٠٠
وخلى القوانين تدلك ع القاتل ٠٠

جمال : تقصد ايه ؟

الشيخ محمد : أقصد أنك أنت فى وادى وأنا فى وادى تانى ياحضرة
الضابط ٠٠

(تبدأ الخماسين فى الحركة)

السلام عليكم ٠٠

(يستدير ويتحرك متجها نحو الباب) ٠٠

جمال : أنا مش فاهم البلد دى ٠٠ ولا شيخ البلد دى ٠٠ القانون
لازم ياخذ مجراه ٠٠ القانون فوقنا كلنا ٠٠ والعدل لازم
يتحقق ٠٠

الشيخ محمد : (يلتفت اليه) أيوه العدل لازم يتحقق ٠٠ لكن العدل
بعين مين ٠٠

(يخرج الشيخ محمد وقد ازداد عواء الخماسين ٠٠٠
وتأخذ الاضواء فى الخفوت حتى تطفأ) .

المنظر الثالث

(نساء الأصواء عن المنظر الأول نفسه في القبرة ، وقد
وقف خليل أبو حسنين بينما ابن أخيه مازال جالسا .. والريح
مازالت تموى) .

خليل : يللا بينا يابنى .. الليل قرب على آخره .. والريح بتزين
علينا ..

(يلف وجهه بشاله البنى اتقاء الرمال)

يللا بينا يابنى ..

حسن : (يسمع صوت أقدام قادمة من بعيد) استنى يا عمى غيه
صوت رجلين بتدب ..

خليل : يمكن يكون عم أيوب

حسن : لا دى رجلين عفية

خليل : دى جبانة مفتوحة للناس كلها .. اسحب بندقيتك وامشى
على طول ..

(يتركان المسرح بينما يدخل عبد ربه أبو محمود الجبانة
وهو في الأربعين من عمره تبدو الصرامة على وجهه يحمل بيده
اليمنى عصا غليظة .. يتأمل خليل وابن أخيه عن بعد حتى يختفيا
عن نظره) .

عبد ربه : يا ولاد دى مشية خليل أبو حسين ياترى ايه اللى جابه
هنا فى وقت زى ده .. يكون مات له ميت قريب .. والا جاي

يزور عليه ٠٠ لا مش معقول في الوقت ده من الليل ٠٠
آه يا عالم ٠٠

(يتوقف بين القبرين أمام الصبارة)

ياترى مين فيكم عليه ٠٠ ؟ ياترى مين فيكم قبر اخوى ٠٠
حزنى عليك شديد ياود ابوى ٠٠ حزنى عليك ماينتهيش ٠٠

(يتحرك ليقف أمام قبر هنية)

أيوب : (يظهر من بعيد) ايه يا خليل ٠٠ الليل في آخره ٠٠ والريح
بتشد وكفاية كده وروح ٠٠

عبد ربه : انا مش خليل يا عم أيوب ٠٠

أيوب : (مقتربا منه) مين عبد ربه ٠٠ ؟ ازيك يا ولدى ٠٠

عبد ربه : اهلا يا عم أيوب ٠٠

أيوب : حمد الله ع السلامة ٠٠ امتى وصلت من مصر ٠٠

عبد ربه : دلقيه ٠٠

أيوب : الخماسين شديدة ٠٠ الليلة مش كنت تروح البيت ٠٠ وتيجى
الصبح ٠٠

عبد ربه : خماسين ايه اللي حتمنعنى انى آجى لأخويا ٠٠ دى لو
منعتنى اقتلها ٠٠

أيوب : وليه يا ولدى تجيب سيرة القتل ٠٠

عبد ربه : مبر احنا بنتقتل يا عم أيوب ٠٠ ده تانى اخ ليه يتقتل ٠٠

(يركز نظره على القبر أمامه)

انا جيت خلاص يا عليه ٠٠

أيوب : ده مش قبر عليوه ٠٠ ده قبر هنية بنت خليل أبو حسين ٠

عبد ربه : خليل ليه بنت ماتت ٠٠ ؟ دى مصيبتته تبقى كبيرة ٠

أيوب : كبيرة قوى ٠٠ وأكبر من مصيبتك ٠٠

عبد ربه : المصايب مصايب لا فيها كبير ولا صغير ٠٠ المصيبة تبقى

مصيبة ٠٠ وإذا قسناها متلفيش مصيبة أكبر من مصيبتى ٠٠

اتنين يقتلوا فى سنة واحدة مفضلش من ولاد أبوى غيرى ٠٠

تلتينى ضاعوا وفضل فى التلت ٠٠ أنا تلت دلوقتى ٠٠ شاعر

انى ناقص ٠٠ دى ولحمى متفتت ومرمى ع الأرضى ٠٠

فين قبر أخوى ٠٠ ؟ حتى قبره ما أنا عارفه ٠٠

أيوب : القبر اللى على شمالك ٠٠

عبد ربه : (يتجه نحو القبر) أنا جيت خلاص يا عليوه ٠٠ جيت دمك

مش حيروح هدر ٠٠

(الريح تعوى)

أيوب : اهدا ٠٠ أنت فى جبانته دلوقت ٠٠

عبد ربه : قتلت على الكبير تلاته ٠٠ وحقتل عليك خمسة ٠٠ لا مش

كفاية ٠٠ خمسين لأ مش كفاية ٠٠ مش كفاية فى دمك وفى غدره

شبابك ٠٠ أنت ما كنتش أخويا ٠٠ أنت كنت ابنى ٠٠ أقسم ٠٠

أيوب : مترفعش صوتك هنا ٠٠ أنت بتزلزل أرواح الميتين ٠٠ كفاية

يا عبد ربه ٠٠

عبد ربه : أقسم بالله والليل ونهاره وتربة جدودى مكفينى فىك خمسة

ولا خمسين ٠٠ ياترى ٠٠ مين الفاجر اللى عملها ٠٠ ياترى

عارف أيه اللى مستنيه ٠٠ آه يابلد ٠٠ آه يابلد ٠٠ هنا عليك

٠٠ والله لمربيك ٠٠ وملبسك طرح وشيشان ٠٠

أيوب : ايه أنت مببوعككش الموت .. تقتل خمسين ؟ ايه أنت رسول
عزرائيل ؟

عبد ربه : سيبنى يا عمى أيوب وحدى .. عاوز أقعد وحدى مع
أخوى ..

أيوب : أخوك خلاص مبيقش أخوك .. وكفاية كده وروح ..
الخماسين بتزيد علينا ..

عبد ربه : خليفها تزيد .. دى بتهب من قلبى خليفها تزيد .. وسيبنى
فى حالى يا عم أيوب ..

(يسمع وقع أقدام قادمة وضوء نور كلوب يحمله أحد
القادمين ينتشر حول المكان . عبد ربه يرفع عصاه ... يتبين على
الضوء أبناء عمه .. يصلون اليه) .

عياد : حمد الله ع السلامة يا عبد ربه ..

أيوب : أهم ولاد عمك جم .. حيخلوا الخماسين خماسينات ..
وربنا يستر .. أسيبك بقه .. الفجر على طلوع .. أروح
أنام لى شويه (يخرج) ..

على : حمد الله ع السلامة يا عبد ربه .. استنينا فى المحطة لحد
القطر ماجه وترك المحطة وبرضه ملقيناكشى .. الشيخ
محمد أبو أحمد قال لنا انك فى الجبانة ..

عبد ربه : وايه عرف الشيخ محمد أبو أحمد بمكانى ..

على : واحنا حنعرف ازاي .. أهو محمد أبو أحمد كده ساعات
يعرف حاجات الناس متعرفهاش ..

عبد ربه : طب ياشيخ محمد والله ان وقفت قصادى لأبدأ بيك ..
(ينقل ناظره حول أبناء عمه)

ده الثانى اللى بيتقتل السنة دى .. يتقتل وأنتم موجودين
والقاتل ميخافش منكم .. قولوا لى اتقتل ازاي ومين قتله
صابر : الكلام كتير .. يللا بينا نروح نتكلم فى البيت ..
عبد ربه : لا سييونى دلوقت .. سييونى أفق قدام أخوى .. امشوا
أنتم وسييونى لوحدى ..
عياد : يللا بينا ع البيت نتكلم هناك .. الشيخ محمد أبو أحمد مش
حيسيينا دلوقت .. وحيسمع كل كلمة نقولها ..
عبد ربه : ميسمع والله ممكفينى فى أخويا خمسة ولا خمسين وإذا
وقف قصاى الشيخ محمد .. والا لكبر منه لبدأ بيه وبالاكبر
منه .. وهو لازم يعرف كده ..
(هنا يكون الشيخ محمد قد ظهر على خشبة المسرح ...
وقد أخذت الريح تعوى ، يتحرك ببطء تجاه عبد ربه وابناء عمه
حتى تهدأ الريح وعندها يكون واقفا أمام عبد ربه) .
الشيخ محمد : جاى سخن قوى يا عبد ربه .. أقوى من الخماسين .
عبد ربه : عاوز ايه يا شيخ محمد .. ايه اللى جابك حدانا ..
الشيخ : جاى أعزبك يا عبد ربه ..
عبد ربه : مش حقيل عزا فى أخويا ..
الشيخ محمد : الا لما تقتل خمسين وتبدأ بالشيخ محمد أبو أحمد ..
أهينى قدامك اقتلنى .. لأنك مش حتقتل حد خالص لا واحد
ولا خمسة ولا خمسين يا عبد ربه .. فاهم .. وان ماكنتش
فاهم أفهم .. عاوز تعمل أى حاجة أعملها .. بعيد عن نجعى
.. فاهم يا عبد ربه .. فاهم .. وان ماكنتش فاهم أفهم ..
بقول لك تانى أفهم .. أنت وولاد عمك ..

عبد ربه : مفيش لزوم للكلام ده ٠٠ متغيرنيش ياشيخ محمد احنا ف
أرض طاهرة ٠٠

الشيخ محمد : طاهرة ايه بقى ٠٠ لا اتغير ٠٠ هوه الكلام مش زى
الفعل يا عبد ربه ٠٠ فوق الأرض الطاهرة دى زى مبتقول
حلفت انك تقتل خمسة ٠٠ خمسين فى أخوك ٠٠ وبعدين تقول
طاهرة ٠٠ يا أخى استنى لما تعرف أخوك قتل مين ٠٠ ؟ وتعرف
اتقتل ليه ؟

عبد ربه : أنا مش عاوز أعرف أخويا اتقتل ليه ؟ ٠٠ ده ميهمنيش ٠٠
أنا عاوز أعرف مين قتل أخويا ٠٠ ؟ مفيش سبب فى الدنيا
يدى لحد الحق فى قتل أخويا ٠٠ وتقل لى اتقتل ليه ياشيخ
محمد ٠٠ حاجة غريبة يا أخى المهم أنه اتقتل ٠٠ اتقتل أيوه
أخويا اتقتل وأنت شيخ البلد ٠٠ اللي مفروض انك بتحميها ٠٠
يعنى أنت مسئول عن قتله ودلوقت جايينى ٠٠ تقول أعرف
الأول أخوك اتقتل ليه ٠٠ ؟ أنا مش عاوز أعرف أخويا اتقتل
ليه ٠٠ ؟ دى تفاصيل ميهمنيش أعرفها ٠٠ أنا عاوز أعرف
منك مين قتل أخويا ٠٠ ياشيخ البلد مين قتله قبل متعزنى ٠٠
واذا تصورت انى أقبل عزا منك ولا من غيرك قبل ما آخذ
بتارى تبقى غلطان ٠٠ وغلطان قوى ياشيخ محمد ٠٠ ياشيخ
بلدنا ده أنا بعدما آخذ بتارى نارى مش حتبرد أبدا ٠٠

الشيخ محمد : وحتبتدى بالشيخ محمد أبو أحمد يا عبد ربه ٠٠
(يزداد عواء الخماسين)

عبد ربه : نارى مش حتبرد أبدا أهى حتبقى قوية زى الخماسين
وأشد ٠٠ وأبدأ بيك بغيرك ده شغلى أنا ٠٠
الشيخ محمد : بتهدنى يا عبد ربه ٠٠
عبد ربه : أفهم اللي تفهمه ياشيخ محمد ٠٠

الشيخ محمد : أنت عاوز تعمل مذبحة في البلد دي وأنا مش حسمح لك بكده الا اذا خدتنى الأول .. فاهم .. فاهم يا عبد ربه .. فاهمين كلکم يا حشاشين .. مش حخلى اللى حصل قبل كده يحصل تانى أنت قتلت ثلاثة في أخوك الكبير .. ثلاثة يا عبد ربه ملهمش علاقة بقتل أخوك .. القاتل الحقيقى اعترف من أسبوعين بقتل أخوك .. القاتل راجل غريب مش من هنا .. قتله صدفة .. قضاء وقدر حرك زناد مسدس .. أخوك عاوز يشتريه .. كان فيه رصاصه انطلقت في صدر أخوك .. مات .. الراجل ملهوش مصلحة في قتله .. تقتل ثلاثة يا عبد ربه قبل ماتعرف مين القاتل الحقيقى .. قبل ما تتأكد .. وبعدين تطلع م الثلاثة زى الشعرة م العجين .. قتلت ثلاث أبرياء يا عبد ربه .. ودلوقت ..

عبد ربه : بتقول ايه يا شيخ محمد ؟

الشيخ محمد : بقول لك ثلاثة ملهمش دخل بيك .. ولا بأخوك .. ولا بقتله .. ودلوقت بترفع صوتك بفخر اناك قتلت ثلاثة في أخوك .. افخر على كيفك .. افخر .. القاتل الحقيقى دلوقت في سجن البندر .. أيوه يا عبد ربه عاوز تقتل خمسة .. لا خمسين في عليوه .. وبتهددنى كمان .. يا خسارة يا عبد ربه .. خلاص القتل بقى في دمك حتبقى سفاح محافظة قنا ..

عبد ربه : اسكت .. اسكت يا شيخ محمد .. وقف كلامك ..

الشيخ محمد : كلامى بقى ثقيل على قلبك ..

عبد ربه : لا يا شيخ محمد أنت مش حتهتنى .. أنا عاوز أعرف مين قتل أخويا ؟

الشيخ محمد : سؤال اجابته مش عندي أنت لازم تسأل الأول أخوك اتقتل ليه ؟

عبد ربه : وده يهم في ايه ؟

الشيخ محمد : يهم كثير .. وانت لازم تسأل نفسك قتله كان عدل
والا ظلم ..

عبد ربه : عدل والا ظلم ؟! المهم انه اتقتل وكفاية كده .. ابعد عن
طريقنا ابعد أحسن لك وأحسن للدنيا كلها ..

الشيخ محمد : أنت اللي تبعد عن نجعي وإياك ترتكب جريمة ولا
ترفع سلاح على ولاد النجع .. أنا اللي بقول لك ابعد ..

عبد ربه : بتهددنى ياشيخ محمد ..

الشيخ محمد : أيوه بهدك يا عبد ربه .. فاهم .. وبهدد كل ولاد
الحشاشين .. فاهمين ..

(تأخذ الخماسين في الهبوب ويزداد عواؤها)

ودلوقت بقول لكم روحوا ..

عبد ربه : لأ مش حنروح ياشيخ محمد ..

(يظهر عن بعد بعض رجال البوليس بزيهم العسكري يرتفع

من بينهم صوت يختلط مع صوت الخماسين المزجرة) .

الصوت : سلموا أنفسكم ..

عبد ربه : عملتها ياشيخ محمد .. جيت لنا البوليس ..

الشيخ محمد : لا يا عبد ربه أنا مش حمنعك بالبوليس ولا البوليس

حيقدر يمنعك .. أنا حمنعك بنفسى م القتل .. البوليس جاي

لينا كلنا وقاصدنى أنا بالذات جاي يقبض على والا عليك هوه

ليه عندنا حاجة .. متهمش .. (يرفع صوته) ياشاويش

عبد الستار .. احنا جايين ..

(تأخذ الأنوار في الخفوت حتى تطفأ)

المنظر الرابع

(نضواء الأنوار على مكتب ضابط المباحث في مؤخرة المسرح . ويظهر الضابط جمال وهو يوقع أوراقا ثم يعتدل) .

جمال : (يرفع صوته) عبد الستار .. شاويش عبد الستار ..

الشاويش : (يدخل) تمام يا أفندم ..

جمال : هات لى الشيخ محمد والرجالة اللى معاه ..

(يخرج الشاويش عبد الستار)

أنا حادب شيخ البلد ده .. لازم أأديه .. تمشى فى بر مصر

.. شمالها والا جنوبها متلقيش أسوأ من مشايخ البلد ..

كتلة من اللؤم والخسة والدناءة .. والشيخ محمد ده يطلع

عليهم الأول .. بس أنا لازم أأدبك ياشيخ محمد ..

(يدخل الشيخ محمد ومعه عبد ربه وأبناء عمه)

الشيخ محمد : (بتهكم) خير ان شاء الله يا جمال بك ايه الأمر المهم اللى بتستدعينا ليه ؟

جمال : أنا صبرت عليك كتير ياشيخ البلد .. لكن بالتأكيد انت

متنفعش شيخ بلد .. انت شيخ منصر .. ولازم تترقد ..

الشيخ محمد : ياجمال بيه بلاش اهانات قدام الأهالى ..

جمال : دول أهالى دول .. دول العصاة بتاعتك ..

الشيخ محمد : يا جمال بيه ٠٠

جمال : تقدر تقول لى نيه اللى وداك الجبانة ؟

الشيخ محمد : (يرفع صوته) أنت ملكش كلام عندى ٠٠ يا جمال
بيه ٠٠ أنا كلامى مع البيه المأمور وسعادة الحكمدار وأنا
ماشى دلقيت ٠٠

جمال : مش حقددر ٠٠ أنت حقبات فى الحجز الليلة دى أنت والرجاله
بتوعك ٠٠ أنت خارج ع القانون ياشيخ محمد ٠٠

الشيخ محمد : أنا ماشى وأبقى وقفنى ٠٠

عبد ربه : الحكومة وقعت فى بعض واحنا مالنا ٠٠ ؟

جمال : استنى ياراجل أنت لما أجيلك ٠٠ ياشيخ محمد أنت بتتعامل
مع الخارجين ع القانون ٠٠ وبتتحرك بدون علمى ٠٠

الشيخ محمد : عاوزنى آخذ منك اذن لما أروح الجبانة ٠٠ ولما أعزى
واحد فى أخوه ٠٠

جمال : آه ٠٠ هو ده عبد ربه ٠٠ وعارف انه فى الجبانة ومتقليش ٠

الشيخ محمد : أنت مسالتش عنه علشان أقولك هو مين ٠٠ وأنا
مش عملى أقول لك حعزى مين ؟ وجمال مين ٠٠ ؟ يا جمال
بيه أنا شيخ بلد مش مخبر ٠٠

جمال : أنت بتستعبط ٠٠ وأنا حادبك ولازم حارقدك ٠٠

الشيخ محمد : يا جمال بيه أنت بتقول كلام كبير ٠٠ كبير قوى ٠٠
استعبط ٠٠ وتأدبنى وترقدنى ٠٠

جمال : آه ٠٠

الشيخ محمد : أنت لازم تعرف أنى أنا شيخ بلد من قبل حضرتك
متروح الكلية ٠٠ ومن قبل الحكومة متعينى شيخ للبلد ٠٠
وكنت محترم جدا وعمر واحد قال لى بتستعبط وعمره
ماحد شتمنى ٠٠ قبل الحكومة متعينى شيخ للبلد كنت محترم
جدا وبعدما الحكومة عينتنا شيخ البلد بنتشم وبنتهان ٠٠
استعبط ٠٠ استعبط ازاي ياسعادة البيه ٠٠ دى شتيمة ٠٠
شتيمة كبيرة قوى ٠٠

(الخماسين تدفع زجاج النوافذ)

جمال : ياشاويش عبد الستار اقفل الشبايبك دى ٠٠

(يحضر الشاويش ويأخذ فى قفل الزجاج)

الشيخ محمد : خللى الريح تضرب ٠٠ خليفها يا جمال بيه ٠٠

جمال : وطى صوتك ياراجل ٠٠

الشيخ محمد : أوطيه ٠٠ ؟ أنت ناسى يا جمال بيه انى بشستغل
الشغلانة دى مجانا ٠٠ أنا سايب بيتى م الفجر وأدينا قرينا
على فجر اليوم الثانى وأنا مروحتش البيت مشفتش عيالى وفى
الآخر تقل لى بتستعبط ونأديك ٠٠ ونرفدك ٠٠

جمال : كلامك ده مش حيفير حاجة ٠٠ أنت بتعمل فى البلد دى ضد
القانون وأنا لازم حوقفك ٠٠ حوقف تأثيرك ع الناس ٠٠ أنت
الليلة دى حنابات فى الحجز ٠٠

عبد ربه : الحكومة وقعت فى بعض طب واحنا مالنا ٠٠ ممكن نخرج

جمال : مش قبل ما نعمل لكم تحريات ٠٠

عبد ربه : أنا المعلم عبد ربه من أكبر تجار سوق الخضار بروض
الفرج ودول ولاد عمى ٠٠

جمال : ولاد عمك ولاد خالك ورونا بطايكمم ..
(يخرج عبد ربه البطاقة ويقدمها له)
جايز تكون مزورة .. لازم نتأكد ..
عبد ربه : وتتأكد في قد آيه ..
جمال : جايز يوم .. اتنين .. جايز أكثر ..
عبد ربه : شوف ياسعادة البيه البطاقة مش مزورة .. صحيحة مبه
الميه ..
الشيخ محمد : أنا أضمنه ..
جمال : أبعد عنها ياشيخ محمد .. أنت متواطىء مع القتلة ..
ودلوقت بتدافع عن مجرم ..
الشيخ محمد : المحكمة طلعت عبد ربه براءة ..
جمال : أنا مش فاضى ليكم .. انتو حثباتو في الحجز انهاردده ..
أنت لازم تتعلم تتعاون مع الادارة ..
الشيخ محمد : مفيش لزوم تعقد المسالة ..
جمال : انتو حثباتوا في الحجز ..
الشيخ محمد : البيه المأمور وسعادة مدير الأمن بينى وبينك ..
جمال : الباشا مدير الأمن حاطك في القايمه السوده ..
الشيخ محمد : لا ياجمال بيه .. أنت بتكلمنى وفي دماغك مشايخ
البلد في حقت تانى .. لا أنا مش واحد منهم .. مدير الأمن
عارف مين هوه الشيخ محمد .. يوم متعينت شيخ بلد كان
قاعد مكانك واحنا عارفين بعض كويس .. أعرف انى أنا

مش جاى م الشارع ٠٠ أنت عشان تجلس ع الكرسي ده دخلت
كلية البوليس وأنا عشان أبقي شيخ بلد سبت الأزهر ٠٠ سبت
كليتي عشان عيلتي عاوزه تحافظ ع المشيخة في أسرتنا خذتها
وراثه ٠ الوظيفة دي يا جمال بيه خذتها ورث أبنا عن جد ٠ أنا
السابع في عيلتي وباين حكون الأخير الله يسامحهم اللي
دفعوني ليها ٠٠ خلاص كده ٠٠ كفاية شتايم ٠ بتستعيط ٠٠
وأدبك ٠٠ وأرفدك ٠٠ ربح نفسك يا جمال بيه ٠٠ أنا خلاص
قرقت م الشغلانة ديه ومنيش حريص عليها ٠٠ انما اذا سمحت
خرج عبد ربه وولاد عمه وسبييني أروح أنا م لى ساعة والا
ساعتين وأشوفك بكره ٠٠ الصباح رباح متضحكش الناس
علينا ٠٠ ومتفتحش أبواب للشر بنحاول نسد فيها على قد
منقدر ٠٠

جمال : أنا كل اللي عاوزه ان القانون يمشى في البلد دي ٠٠

الشيخ محمد : القانون يمشى ٠٠ آد يمشى مايمشيش ليه ؟ بس مش
بالعافية ٠٠

جمال : خلاص ٠٠ خلاص يا شيخ محمد تقدر تروح أنت وهمن ٠٠
لكن اعرف ان ده على مسئوليتك أيها حاجة يعملها عبد ربه
وعيال عمه أنا بحملك مسئوليتها ٠٠

الشيخ محمد : حمل ٠٠ حمل ٠٠ أنا ايه اللي محملتوش في النجع
ده ٠٠

(ينظر الى عبد ربه)

عشان تتبسط يا عبد ربه ٠٠ اتبسط ٠٠ اتبسط أنت وعيال
عمك مناخدش منكم الا المشاكل ٠٠

(قبل أن يخرج يذق الجرس يرفع جمال سماعة التليفون
بينما صوت الريح ياخذ في الملو بدرجات مختلفة) .

آلو ٠٠ آلو ٠٠ مين ٠٠ أهلا ليلي ٠٠ ايه مش جايين انهاره
ليه ؟ ايه اللي حصل ؟ ٠٠ تعب من ايه مجدى ؟ ٠٠ عنده
ايه ؟ ٠٠ على صوتك الريح مش مسسمعانى « حمى »
و « الحمى » دى جسات له منين ؟ ٠٠ وحالته ايه ؟ ٠٠
ربنا يستر ٠٠ وديه لدكتور تانى ٠٠ لا انا مش حقدر آجى تانى
مش حقدر ٠٠ حتصل بيكى تانى ٠٠ خلى بالك منه ومن نفسك
٠٠ أيوه حتصل ٠٠ وأنت برضه ابقى اتصللى ٠٠ طمنبنى
عليه ٠٠

الشيخ محمد : لامؤاخذه يا جمال بيه ٠٠ احنا سمعنا بالضرورة
سلامة مجدى ألف سلامة ٠٠ تقدر تسافر ٠٠ يوم والا اتنين
تطمئن عليه وتيجى تانى ٠٠

جمال : مش حقدر ياششيخ محمد ٠٠ مش حقدر حالة الأمن هنا
مخيفة ٠٠ مخيفة جدا ٠٠ والأمور متلخبطة فى كل حتة ٠٠ فى
البلد والنجع متلخبطة فى كل حتة ٠٠ فى البلد والنجع وفى
بيتى وفى مخى ٠٠ كل حاجة تعبانى ٠٠
(تهز الريح الشباك)

حتى الخماسين مش سيبانى فى راحة ٠٠

الشيخ محمد : سافر وخذلك يوم وتعال ٠٠ وحتلاقى كل حاجة فى
محلها حتى الخماسين ٠٠

جمال : أنت بتقول لى سافر ٠٠ وأنت أكثر الناس اللي بخاف منهم
ع القانون ٠٠ وأنا مش حقدر أسافر طول ما أنت هنا وطول
ما القانون غايب م البلد دى ٠٠ أنا مش ماشى ٠٠ لو مت
أنا ولو ماتت مراتى ولو حتى مات ابنى مش حسيب البلد
دى الا لما القانون يمشى ٠٠

الشيخ محمد : (يتحرك ليخرج وقد ظهرت عليه علائم عدم الرضا)

عبد ربه : استنى ياشيخ محمد ٠٠ أيوه ياجمال بيه ٠٠ قانون ٠٠
قانون أيه اللي بتتكلم عنه ٠٠ طب ناس عاقلة وناس مجنونة
طب واحنسا مجانين ٠٠ وانتوا يا عاقلين يللى بتتكلموا فى
القانون فهمونى أنا وولاد عمى هنا ليه ٠٠ ؟ أيوه ياخضرة
الضابط راجل معلم كبير جاى يزور أهله تقبض عليه ليه ؟
وبأى تهمة ٠٠ ؟ فهمنى ٠٠

جمال : قبضنا عليك تحرى ٠٠ وشيخ البلد ضمنك ٠٠

عبد ربه : كده بالبساطة دى بتقبض ع الواحد فى بلده فى أى وقت
ويخرج فى أى وقت وتقولولى قانون ٠٠ طب قبلنا ٠٠ لكن
مش خارج ٠٠ لا أنا ولا ولاد عمى الا لما تقولوا لى يابتوح
القانون مين قتل أخوى ؟ مين قتل أخوى يا حكومة ؟ يا حكومة
مين قتل أخوى ؟ أنا لازم أعرف انتوا يللى بتتكلموا ع القانون
والعدل أخويا مين قتلوا ؟ متتكلما ٠٠ قولوا لى مين قتل
أخويا ؟ وعملتوا له ايه ؟

(يأخذ صوت ربح الخماسين فى ارتفاع تتحرك الشبابتك
بينما الصوء يخف تدريجيا حتى يطفأ) .

الفصل الثاني

ملحوظة للمخرج :

✳ من الخير أن يقسم المسرح الى ثلاثة أقسام :

الأول : وهو مندرية بيت الشيخ محمد

والثاني : وهو مندرية بيت عبد ربه

والثالث : وهو مكتب ضابط المباحث

المنظر الأول

(تضاء الأنوار عن حجرة بسيطة الاثاث مكونة من كنبتين وحصيرة مفروشة على الأرض عليها طبلية ومنضدة عليها صينية بها قلة وابريق . وشماعة عليها جلباب الشيخ محمد وفوطه . ويظهر الشيخ محمد مستلقيا على الكنبه ، تدخل عليه زوجته أم أحمد . من الواضح أن هناك بابين للحجرة أحدهما يؤدي الى الداخل والآخر يؤدي الى الخارج) .

أم أحمد : أنت نايم يا أبو أحمد

الشيخ محمد : لا يا أم أحمد

أم أحمد : أنا حضرت الفطار ليك

الشيخ محمد : هاتيه ..

(تحضر صينية الطعام تضعها على الطبلية يترك الشيخ محمد الكنبه ويجلس على شلثة على الأرض ... تحضر له ابريق ماء وطشت بفسل يديه ... تأخذ الابريق لتعود سريعا . الشيخ محمد يبدأ الطعام وهو يرفع صوته) .

بسم الله الرحمن الرحيم .. اللهم ديمها نعمة واحفظها من الزوال ..

أم أحمد : (تجلس على الأرض) أحمد عاوز يسافر مصر

الشيخ محمد : ليه خير ان شاء الله .. يعمل ايه هناك ..

أم أحمد : حيروح يقدم في الكلية

الشيخ محمد : هيه النتيجة ظهرت ..

أم أحمد : لا لكن الكلية عاملة اعلان عن فتح باب التقديم .

الشيخ محمد : هيه فيه كلية بتقبل الطلبة قبل النتيجة ماتظهر ..

أم أحمد : ماهو يقدم دلوقت وان نجح أهو يمشى في الامتحانات وان
ما نجحشى الله لا يقدر يسحب أوراقه .. وأنت عارف أحمد
شاطر قوى وحينجح ان شاء الله ..

الشيخ محمد : وكلية ايه بقى دى ؟

أم أحمد : كلية البوليس ..

الشيخ محمد : ياساتر يارب .. أنا لا يمكن أوافق ان ابنى يدخل
الكلية دى ياساتر يارب . يشوف له حاجة تانى غير البوليس .
ده أنا عاوز استقيل من المهنة دى .. مشيخة البلد تابعانى
قوم أودى ولدى يبقى ضابط بوليس .. مش كفاية .. أنا
لا يمكن أسلم ابنى للمصير ده .. سبع جودود ليه مشايخ بلد
ويوم ما أفكر أسيب المهنة دى يطلع لى واد يقول لى أنه عاوز
يبقى ضابط بوليس .. ده أنا حاكون آخر شيخ بلد في عيلتى
ولا يمكن أسمح ان ابنى يبقى ضابط بوليس .. ابنى يبقى
شيخ بلد بدبورة على كتفه .. تطور تطور ايه ده يا ولاد ..

أم أحمد : كلام ايه ده ياشيخ محمد ..

الشيخ محمد : كلام ايه .. نادى لى الولد بسرعه ..

أم أحمد : هوه خرج م الصبح ع الغيط ..

الشيخ محمد : الغيط أحسن بكثير م الشغلانه دى ..

أم أحمد : والنبي ياشيخ ما تكسر بخاطره ٠٠ أهو سيبه ان نجح
في امتحاناتهم دخل وان مانجشي ميخلشي .

الشيخ محمد : لا ميخلش نجح والا ما نجحش .

أم أحمد : أنت مزاجك مقريف دلوقت ٠٠ سيب الموضوع ده لحد
متروق ٠٠

الشيخ محمد : أروق والا ما أروقش ٠٠ أوعى تكلميني في الموضوع
ده تاني مش كفاية اللي احنا فيه ٠٠ ياشيخة ده ظابط مباحث
البندر ولده عيان مش قادر يروح يسافر يشوفه ٠٠ دى
شغلانة صعبة ٠٠ خليه يشوف له كلية تعيشه بدون مشاكل ٠٠
يشتغل مدرس ٠٠ يشتغل مهندس ٠٠ يشتغل دكتور يشتغل
محامى يشتغل أى حاجة الا شغلة مشيخة البلد ما هو أى
واحد كبر والا صغر شيخ بلد ٠٠ ياشيخة صديقتى نفسى ٠٠
خدنى صينية الأكل مش وأكلين ٠٠

فوزية : (تدخل) صباح الخير يابا ٠٠

الشيخ محمد : (يظهر الارتياح على وجهه) صباح الفل ياست الكل
٠٠ تعالى ٠٠ تعالى ٠٠

فوزية : يابا عم عليان بره عاوزك

الشيخ محمد : خليه يدخل ٠٠

(تخرج فوزية ومن ورائها أمها)

ياترى عاوز أيه دلوقت دى الدنيا بدرى على زيارته

عليان : (يدخل) السلام عليكم ياشيخ محمد ٠٠

الشيخ محمد : (يقف) أهلا ٠٠ أهلا يابن العم ٠٠

عليان : أهلا بك ياشيخ محمد .. أنا بحاول أقابلك ليه أسبوع ..
الشيخ محمد : أهلا .. أهلا عليان .. يا فوزية الفطار بسرعة لعمك
عليان ..

عليان : فطار أيه ياشيخ محمد .. أنا فطرت من زمان .. الشاى
كفاية .. كفاية قوى .. ده كويس اللي أنا لقيتك دلوقت ..
الواحد مش عارف يتلم عليك ..

الشيخ محمد : ما أنت عارف المشغوليات .. أهلا بك خير إن شاء
الله ..

فوزية : (تدخل بالشاى) تفضل يا عم عليان ..

عليان : ماشاء الله عليها كبرت .. وبقيت ست بيت وشيخة عرب ..
ماشاء الله عليها .. عروسة وعاوزين نفرح بيها ..
الشيخ محمد : أهلا .. أهلا بك يا عليان .. اشرب الشاى .. البيت
لسه صغيرة قوى .. قوى ..

(فوزية تقدم الشاى وتخرج)

دى عيله ياشيخ ..

عليان : عيلة أيه ياشيخ .. ؟ البيت كبرت قوى

الشيخ محمد : أيه الحكاية يا عليان ..

عليان : أنا حدخل فى الموضوع على طول .. أنا عاوز فوزية لجابر
.. أهو جابر ولدك زى ما فوزية بنتك ..

الشيخ محمد : (يبتسم) كلام أيه يا عليان يابن عمى فوزية العيلة
دى تتجوز .. أيه اللي حصل .. يا عالم .. دى تالت مرة
الأسبوع ده اتفتاح فى جوازها ..

عليان : مفيش حد أولى بيها من ابن عمها جابر ..
الشيخ محمد : بس البت لسة صغيرة .. وأنا مقدرش أجوزها ..
عليان : صغيرة ايه ياشيخ محمد .. ؟ فوزية صغيرة ؟ دى قربت
تتم ستاشر سنة .. خبر أيه ياشيخ محمد البنات بتتجوز
أصغر منها .. وفيه بنات فى سنها معاهم عيل ولا اتنين ..
الشيخ محمد : البت لسه صغيرة وأنا مقدرش أجوزها دلوقت ..
عليان : أنت حتعمل لك قانون لوحديك .. صغيرة ايه .. أوعى
يكون جابر مش مالى دماغك .. ده مهمما كان ابن أخوك ..
الشيخ محمد : جابر سيد الرجال .. بس البت لسه صغيرة ع
الجواز ..
عليان : أنت حتعمل لك قانون لوحديك ..
الشيخ محمد : قانون .. قانون .. كل الناس الأيام دى بتتكلم ع
القانون ، القانون ورانا ورانا ..
عليان : خبر ايه ياشيخ محمد ..
الشيخ محمد : دى بنتى ياعليان .. بنتى لازم أكون مقتنع انى
أجوزها .. وان الوقت مناسب لجوازها .. لما أحس بكده
حجوزها ..
عليان : لأ ده مش كلام .. أنت بتطردين بصنعة لطافة .. أنا مش
ساييك أنا حكلم كل ولاد عمنا فى الموهتوع ده .. أنت ملكش
حق يا محمد .. لأ ملكش حق ..
الشيخ محمد : هدى .. هدى .. واشرب الشاى ..
عليان : (يقف) شاى ايه ياشيخ .. ؟ أنا ماشى دلوقت وأفوت
عليك بعدين ..

الشيخ محمد : متقعد يا عليان وصلى ع النبي ٠٠
عليان : اللهم صلى ع النبي ٠٠ أنا ماشى وأفوت عليك تكون رايق
وترد على رد زين ٠٠ (يخرج)
الشيخ محمد : والله عال فوزية كبرت وكثرت خطبانها ٠٠ فوزية ٠٠
يا فوزية ٠٠
أم أحمد : (تدخل) فوزية في الحوش بتخبز مع البنات ٠٠ عاوز
حاجة أجيبها لك ٠٠
الشيخ محمد : تخبز ٠٠ هو ده وقت خبز ٠٠ والخماسين حتسيبهم
في حالهم ٠٠
أم أحمد : الخماسين هديت دلوقت وشكلها مش هتهب بسرعه ٠٠
الشيخ محمد : هيه الخماسين ليها شكل يا أم أحمد ٠٠ ربنا يستر
وتراب الخماسين ميغطيش العيش ٠٠ والا مش مهم ٠٠ احنا
من يوم الخماسين بناكل عيش بتراب ٠٠ الخماسين دخلت في
كل حاجة في حياتنا حتى العيش ٠٠
أم أحمد : عاوز حاجة أجيبها لك ٠٠
الشيخ محمد : ياريتنى علمتها ٠٠ كنت أصد أى واحد ييجى يطلب
أيدها منى ٠٠ دى البت لسه صغيرة ٠٠
أم أحمد : بتتكلم على فوزية ؟ خير أيه ياشيخ محمد ؟ فوزية لسه
صغيرة ؟ فوزية ست البنات الا ما فيه واحدة بحلاوتها ٠٠
الشيخ محمد : آه بس لسه صغيرة ٠٠
أم أحمد : صغيرة في نظرك يا أبو أحمد ٠٠
الشيخ محمد : ثلاثة طلبوها منى في أسبوع واحد ٠٠ حاجة غريبة

الواد حيصيع منى ويروح البوليس والبنت تضيع منى وتتجوز
وده كله فى موسم خماسين واحد ..

أم أحمد : والسبت أم خالد .. عارفها .. مرات فتحنى الأنور ..
جاتنى وعاوزة تاخذ فوزية لولدهم خالد المدرس الللى فى مصر
.. أنتت عارف خالد .. مؤدب ومتعلم وزين قوى ..

الشيخ محمد : بتقولى آيه يا أم أحمد .. عاوزانى أودى البنت مصر
.. عاوزة فوزية تبعد عنى وتروح مصر كلام آيه ده يا أولاد
.. وأوعى تكونى تكلمت معاها فى حاجة .. أوعى .. ده
مش كلام نسوان ..

أم أحمد : أبوه عاوز ييجى يكلمك وخايف منك .. أيوه ناس كثير
خايفة منك ..

الشيخ محمد : آيه يا أم أحمد .. ؟ باعض والا باعض (يصمت
لحظة) أيوه باعض قولى لها اياك ييجى يكلمنى ، يا شيخة أنت
حرام عليك .. حرام عليك تكلمينى فى الموضوع ده ع
الصبح يا صباح يا علیم يا فتاح يا كريم .. ده أنا ليه أسبوع
منمتش الللى ورايا مكفينى ..

أم أحمد : ماهو دول عيالك برضه ..

(تبدأ ریح الخماسين فى الهبوب تدريجيا)

الشيخ محمد : آهى بدت تهب يا أم أحمد .. أيوه بدت تهب ..
ومش حتقف .. قومى هاتى لى الجلابية ..

(يزداد صوت الريح قوة)

أهو يبقى عجینك باظ يا فوزية ..

(تسمع فوزية تصرخ)

أيه فيه ؟ فوزية جرا لها حاجة ٠٠ أيه فيه ؟
(يتحرك نحو الباب ليخرج فتدخل فوزية ومازالت بقية
العجين على يديها)

فوزية : يا با الحق ٠٠ الحق يا با ٠٠ الحق يا با ٠٠
الشيخ محمد : (بهلع) أيه فيه ؟! أيه فيه يا فوزية ٠٠ ؟ أيه فيه
يا بنتى ؟

فوزية : يا با ٠٠ يا با (الريح تزداد قوة)
الشيخ : (يمسك بيديه كتفها) أيه فيه يا بنتى ٠٠
فوزية : الحق يا با ٠٠ البنات بيقولوا الحكومة بتحفر قبر هنية ٠٠
صحيح يا با ٠٠ صحيح يا با ٠٠ الحق ٠٠ أمنعهم يا با ٠٠
أمنعهم ٠٠ مش أنت الحكومة فى النجع ٠٠ فيه حد يقدر يعمل
حاجة من غير مياخد رأيك ٠٠

(يزداد انفعالها وتأخذ فى البكاء)
يا با الحق ٠٠ هنية دى أختى ٠٠ اتربينا سسوا ٠٠ الموت
خطفها بسرعة ٠٠ متخلهمش ٠٠ يا با يلعبوا فى جثتها ٠٠
(تصرخ وهى تبكى والريح تزداد قوة)
آه يا هنية ٠٠ آه يا أختى ٠٠

الشيخ محمد : هدى يا بنتى هدى ٠٠ هدى ٠٠ أنا خارج رايح أشوف
حصل أيه ؟ متخافيش مش حيصل حاجة ٠٠ محدش يقدر يحفر
قبر هنية ولا حيلعب بجثتها متخافيش يا بنتى ٠٠
أم أحمد : (تدخل) ماهو أنت لازم تشوف لك حل فى الحكاية دى ٠٠
الشيخ محمد : خرجت وجيتى وبرضه مجبتيش الجلابية ٠٠

أم أحمد : مهو الهم ينسى .. (تخرج)
الشيخ محمد : يافوزية كفاية بكأ .. هدى نفسك ..
فوزية : يا حبيبتي ياهنية كله ده يعملوه فيك وبعد موتك ..
(يزداد نشيجها وتزداد الريح قوة)

أم أحمد : (تدخل وبديها الجلاب) همن بينبشوا القبور ليه ..
دى هنية ياعيني ساعة ماماتت الله يرحمها كشف عليها الدكتور
حسيب حكيم الصحة .. هيه الحكومة مالها اليومين دول ..
الشيخ محمد : (يلبس الجلابية فوق ملابسه ويأخذ في لف عمامته)
والريح يزداد صوتها قوة (هدى يافوزية هدى .. وأنت
يا أم أحمد سكتيها .. (بعد الانتهاء من لف عمامته)
أنا حسيبك ورايح المركز وانتى يافوزية .. مش عاوز بكى
ولا عياط .. مع السلامة ..
(يخرج بينما الريح تزداد قوة ، فتحتفن الأم ابنتها وقد
بدا عليها الخوف) .

أم أحمد : ربنا يحفظك يابنتى .. ربنا يحفظك .. ربنا يكفيك شر
المقدر ..
(الخماسين مازالت تهب . تخفت الاضواء تدريجيا
حتى تطفأ) .

المنظر الثاني

(تضاء الأنوار على منضدة في بيت عبد ربه بها الأثاث
نفسه الموجود في حجرة استقبال بيت الشيخ محمد باستثناء
الصينية بما تحتويه من قلة وأبريق ماء . تتمركز الجلسة في
الناحية اليسرى التي يحتل فيها الأثاث ثلث مساحة السرح ،
بينما تظل المساحة الباقية في الناحية اليمنى ، فارغة . وللحجرة
بابان أحدهما يؤدي إلى الداخل والآخر يؤدي إلى الخارج ..
يظهر عبد ربه جالسا مع أبناء عمه الأربعة ورياح الخماسين يرتفع
صوتها في الخارج) .

عبد ربه : رياح الخماسين بتعوى زى دياب الجبل كأنها جعانة ليها
أيام .. عمرى ماشفت الخماسين بالعنف ده ..

عياد : أهى الخماسين نازلة ع البلد خراب مش سـايبـة محل الا
وخرباه .. قلعت الشجر وموتت الزرع .. والجناين السنة
دى بقيت خراب ..

عبد ربه : لو كان بايدى لحركها على النجع بيت بيت .. النجع اللى
قتل لى اتنين .. اتنين .. لكن أنا مش حسنتى لما هى تخرب
النجع ده .. أنا اللى حخر به بايدى .. بس الأول تقولوا لى
مين قتل عليوه .. ؟ انتو لحد دلوقت مقلتلش مين قتل
أخوى .. ؟ أيوه مين قتل أخوى .. ؟

عياد : احنا بنشك ..

عبد ربه : بتشكروا .. أنا مش عاوز شك ..

عياد : احنا بنشك في خليل ..

عبد ربه : خليل مين ؟

عياد : (يشترك معه أكثر من واحد)

خليل أبو حسين ..

عبد ربه : (يقف مذعورا) خليل يقتل .. مش معقول ويقتل مين أخويا ؟ خليل صاحبي .. وحبيبي يقتل عليه .. قولوا كلام غير كده ..

علي : كل الشواهد بتقول كده .. واحنا مش شاكين في حد غيره .. تسعة وتسعين في المية هود ..

عبد ربه : تسعة وتسعين في المية هود .. خليل أبو حسين .. اللي مربى عليه ومكبره على أيديه .. يقتله وتقول لي تسعة وتسعين في المية .. تسعة وتسعين آيه .. !! وميت آيه يعني نقتل خليل أبو حسين وبعدين يطلع مش هود .. خليل أبو حسين صاحبي وأخوى زيه زى عليه تمام .. نقتله وبعدين يطلع مش هود ..

صابر : هو ياعبد ربه هود ..

عبد ربه : يا اخوانا أنا قاتل ثلاثه في أخويا الكبير ومكانش مكفيني وبعدين محمد أبو أحمد قال لي انه ولا واحد منهم قتل أخويا ..

صابر : محمد أبو أحمد بيضحك عليك

عبد ربه : محمد أبو أحمد اللي انتو شفتوه انهاردت بيتكلم مع ضابط البوليس .. محمد أبو أحمد شيخ النجع ده يضحك على .. محمد أبو أحمد يكذب طب قول حاجة تاني يا صابر .. قولوا

حاجة تانى يا اخوانا ٠٠ طب انتو متعرفوش محمد أبو أحمد
٠٠ كمان أنا معرفوش ؟ محمد أبو أحمد عمره ما يكذب ٠٠

صاير : بس كذب عليك ٠٠

عبد ربه : يكذب على ليه ؟

على : فيه حاجات كتير يابن عمى أنت متعرفهاش ٠٠

عبد ربه : قولوها لى ٠٠ قولوا لى الأول هو خليل يقتل عليه ليه ؟
ادونى سبب واحد يخللى خليل يقتل عليه وأنا أصدقكم ٠٠

(يقترب من على وينظر اليه وبحول ناظره الى بقية

أبناء عمه) .

انتو بتقولوا كل الشواهد بتقول ان خليل قتله فايه هيه الشواهد
دى ٠٠٠

قول يا على خليل قتله ليه ؟

على : أصله ٠٠ (يتلجلج ٠٠ ثم يصمت)

عبد ربه : أصله ايه ٠٠ متقول ٠٠

على : ماخبرشى ٠٠

عبد ربه : ماخبرش وعازن تقول ان خليل قتل عليه ٠٠ خليل الراحل
اللى فى حاله ٠٠ ده هو فى حاله وأهله فى حالهم لا عمرهم
قتلوا ولا سرقوا ولا نهبوا يقوم انهارد يقتل عليه ٠٠ قولوا
كلام غير كده ٠٠

(ينظر اليهم)

انتوا مخبيين على حاجه ؟

(يستمر في النظر اليهم . يتوقف فجأة ثم يرفع

رأسه) .

هيه الخماسين سككت ليه ؟

ياترى هيه مخبيه على حاجه ٠٠ ؟

متهى ياخماسين هبى ٠٠ قولى اللى عندك مادام ولاد عمى

ساكتين ٠٠ هبى ياخماسين هبى ٠٠ الخماسين ساكته ٠٠

وانتو ساكتين ٠٠ وأنا عاوز أعرف الحقيقة مين قتل أخوى ؟

حسنين : خليل أبو حسين ٠٠

عبد ربه : شفته ؟

حسنين : لا

عبد ربه : حد قال لك

حسنين : لا

عبد ربه : طب هو اتقتل فين

حسنين : اتقتل في سوق التلات قريب لسوق البهايم

عبد ربه : ومين شافه ؟

حسنين : مش عارفين

عبد ربه : يعنى ايه ؟ البلد مليانه ناس ٠٠ ولأزم الناس بتتكلم ٠٠

هو اتقتل الصبح والا بالليل ؟

حسنين : الصبح

عبد ربه : أنت بتتكلم بالقطارة متقول لى اتقتل امتى وازاى وفين ؟

حسنيين : كانت الساعة تسعة ونص صبح التلات والسوق منصوب
٠٠ الشاويش عبد الستار لقي جثة عليوه مرمية ع الأرضي
غرقانة في الدم ٠٠ خدوه المستشفى ٠٠ بعقولنا رحنا ٠٠ لقيناه
ميت ٠٠ ماكانش فيه روح ٠٠ رحنا السوق نسأل نحاول نعرف
حاجة كانت الخماسين شديدة ٠ شديدة ٠ رامية في الشوارع
تراب والعفرة غيمة سودة ٠٠ محدش شايف حاجة ولا يقدر
يشوف ٠٠ الناس سابت السوق ومشيت ٠٠ الدكاكين قفلت
٠٠ يومها ملقيناش حد في السوق ٠٠ لكن قبل كده ماكانتش
الريح هابه ٠٠ الخماسين كانت نايمة شوية ٠٠ يعني السوق
كان فيه ناس لكن كل ما نسأل حد ينكر انه راح السوق يومها
ولا فرش فرش ولا فتح دكان ٠٠ ماحدش عاوز يتكلم محدش
راضى يجيب سيره ٠٠ واحنا بنحاول نعرف من دلقيت مفيش
حاجة أكيدة دلانا ع القاتل ٠٠ لكن احنا عارفين انه خليل
أبو حسين ٠٠ فكرنا نقتله لكن قلنا نستنى لما ينحكم في قضيتك
ولما خدت البراءة قلنا برضه نستنى لما تيجي ٠٠ واحنا وعيلتنا
كلها مستنيين أوامرك ٠٠

عبد ربه : (ساخرا بألم) أخويا اتقتل يوم التلات والسوق منصوب
يعنى مات قدام الناس كلها ٠٠ وماحدش راضى يتكلم ، أفهم
ان احنا نعرف منتكلمش عشان ناخذ بتارنا ٠٠ أفهم ان
البوليس ميعرفش لكن احنا منعرفش ازاي ٠٠ الناس خايقة
٠٠ الناس تخاف منينا وتكلم ٠٠ دا القاتل لازم يكون مجرم
قوى ولزم تكون عيلته قوية ده مفيش حد هنا أقوى منينا ٠٠
والبلد مبتخافش من حد غيرنا فايه اللي سكنت الناس ٠٠ ؟
ايه اللي سكنتهم ٠٠ ؟ أفهم ان الناس متقولش للبوليس ٠٠
لكن ماتقولناشي ليه ؟

يا اخوانا قولوا كلام غير كده ؟

(يصمت)

وبعدين تقولوا انه خليل ٠٠ وتقولوا مش متاكدين وبعدين
تقولوا احنا عارفين انه هو ٠٠

على : أصله كان فيه مشاكل بيناتهم ٠٠

عبد ربه : مشاكل بخصوص ايه ؟ فلوس ٠٠ ورث مشاكل ايه اللي
خليل يعملها ٠٠ ؟ ياخوانا قولوا حاجه ثانيه ٠٠

على : أصله

عبد ربه : أصله ايه ؟

على : افترض انه خليل حناخد تارنا منه ولا حتقول ده صاحبنا
واخوانا ٠٠

عبد ربه : لو اخويا الكبير قتل اخويا الصغير حاخد تارى منه ٠٠
وأنا مش عارف آخد منكم خبر ٠٠ ساعة تقولوا تسعة وتسعين
فى المية وساعة تقولوا الشواهد ٠٠ وساعة تقولوا مشاكل
حولتها للغز ٠٠ قتل عليوه بقى لغز ومحدث حيحل اللغز
ده الا الشيخ محمد ٠٠

عياد : ولا الشيخ محمد يا عبد ربه ٠٠ أنا بيتهى لى انه له ضلع
فى الجريمة ٠٠ وبيتستر ع القاتل ٠٠

عبد ربه : الشيخ محمد يتستر ع القاتل ٠٠ قاتل عليوه ايه
يا اخوانا ٠٠ ؟ خليل يقتل عليوه ٠٠ والشيخ محمد يتستر ع
القاتل ٠٠ دى الدنيا اتغيرت والبلد مبقيتش بلد ٠٠ انتوا

لخبطتم عقلى ٠٠ وأنا مش حتكلم معاكم ٠٠ أنا رايح للشيخ
محمد ٠٠

(يتجه نحو الشماعة يأخذ بيده الجلباب يطبقه ويضعه
على كتفه)

على : الشيخ محمد مش فى البيت ٠٠

عبد ربه : آمال فين ؟

على : يا فى الجبانة يا فى المركز ٠٠

عبد ربه : وايه اللي يوديه الجبانة ٠٠

على : أصل الحكومة عاوزة تعيد الكشف على جثة هنية ٠٠

عبد ربه : هنية بنت خليل ٠٠

صاير : احتمال هيه رخره تكون اتقتلت

عبد ربه : عليوه يتقتل واحتمال هنيه تكون اتقتلت ٠٠ يانهار اسود

٠٠ ايه اللي جرى فى الدنيا دى ٠٠ ده أنا لازم أعرف الحقيقة

٠٠ لازم أروح للشيخ محمد أبو أحمد فى الجبانة فى المركز فى

البيت فى الجن لزرق لحد ملاقيه ياداهيه سوده ٠٠ ايه اللي

انتو مخبيينو على ٠٠ هنيه تموت مقتوله وعليوه يتقتل ٠٠

ايه اللي بيحصل ده يارجاله دى حاجة فوق العقل ٠٠

(تأخذ ريح الخماسين فى الهبوب بشدة)

أهى الخماسين اتحركت ٠٠ هبت يللا والا خليكم انتو ممنكوش

فايده ٠٠ أنا حدور ع الحقيقة وحدى ٠٠ حخرج أدور

عليها ٠٠ حمشى مع الخماسين جسايز تدلنى عليها ٠٠

(يتوقف) ٠٠

أيود هبي ياخماسينى هبى ٠٠ أفردى جناحك وخذينى مع
رياحك للحقيقة ٠٠ خدينى على جناحك لنور الحقيقة ٠٠ أيود
خدينى لنور الحقيقة ٠٠

(يرفع يديه ثم يضعهما على عينيه ويقترب من الباب
وقد أنزل يديه من عينيه ورفعها الى أعلى ٠٠)

أيود ياخماسين هبى ٠٠ وبلغينى للحقيقة ٠٠ بلغينى للحقيقة ٠

(تخفت الأضواء تدريجيا)

أنا عايش فى ضلمه ياخماسين ٠٠ أنا عايش فى ضلمه

المنظر الثالث

(نضاء الأنوار على حجرة ضابط المباحث . المنظر الثالث
نفسه في الفصل الأول) .

يدخل الضابط جمال وقد تغمر وجهه وملابسه وقبل أن
يجلس على كرسيه يقف بجوار المكتب ... يضع يديه على
حافته . الريح تضرب زجاج النافذة) .

جمال : كل حاجة في البلد دي واقفة ضد القانون حتى الخماسين
بتحاول تمنعنا من اداء واجبنا .. الناس تقدر عليهم انما
الخماسين تعمل فيها ايه ..؟ شاويش .. شاويش عبد الستار

الشاويش عبد الستار : (يدخل) تمام يا أفندم

جمال : مفيش أى أخبار جديدة ؟

الشاويش : لا يا أفندم بس بيقولوا ان أهالى النجع والنجوع المجاوره
ليه زعلوا لما عرفوا بخبر نبش قبر هنيه ..

جمال : الأهالى دول الجهل متفشى فيهم ومش قادرين يفهموا القانون
ولا يعرفوا يعنى ايه قانون .. لكن ده ميمنعناش ان احنا
نعمل الصبح .. ومادنا ماشيين ع القانون نبقى احنا صبح ..
وأنت روح شوف الشيخ محمد وصل والا لسه واذا ماكنش
وصل ابعت له أى حد يجيبه ..

(يدخل الشيخ محمد)

الشيخ محمد : السلام عليكم

جمال : وعليكم السلام ياشيخ محمد

الشيخ محمد : أنا رحلتك الجبانة ملقيتش حد فرجعتك هنا ٠٠

(يخرج الشاويش عبد الستار)

أيه اللي حصل يا جمال بيه ٠٠ ايه اللي اتعمل في قبر هنية ٠٠ ؟

ليه القبر يتنبش ٠٠

جمال : وأنت دخلك ايه ؟

الشيخ : دخلى ايه ؟ أنا شيخ البلد هنا ؟

جمال : أنت بتتعدى حدودك ٠٠ شيخ البلد مهمته أنه ينفذ الأوامر ٠

مش يسأل ٠٠ وأنت خرجت على حدودك كتير ٠٠ وأنا عاوز

أعرف ٠٠ أنت عملت في جثة هنية وأمها ايه ؟ ٠٠

الشيخ محمد : أعمل في جثة هنية وأمها ايه ؟!!

أعمل فيهم ايه ٠٠ أنت لو سمحت تقل لى أنت حتعمل في جثتهم

ايه ؟ أديك حفرت قبرهم وخرجت جثتهم حتعمل فيها ايه ؟

البلد زعلانه والناس زعلانيين ٠٠

جمال : البلد زعلانه فرحانه مش ده المهم دلوقت المهم أنت تقل لى

عملت ايه في الجثث ٠ ٠

الشيخ محمد : أعمل فيهم ايه ؟ هو ايه اللي بتفكر فيه ٠٠ أعمل في

الجثث ايه ؟ ماهى عندكم انتو حتعملوا فيها ايه ؟

جمال : احنا ملقيناش جثث في القبر خالص ٠٠ ملقيناش غير عظام

متحللة من زمان ودى حاجة غريبة ٠٠ جثة هنية وأمها راحت

فين ؟ الدكتور حسيب حكيم صحة قنا شاف العظام وهو يقول
ان البقايا دي عمرها سنين ٠٠ يعنى الجثث اتسرقت ٠٠

الشيخ محمد : اتسرقت ؟

جمال : ايوه اتسرقت وأنا متأكد انك المسئول عن السرقة دي ٠٠
الشيخ محمد : تكونوا محفرتوش كويس والخماسين خلتكم مشفتوش
الجثة ٠٠

جمال : الخماسين كانت شديدة قوى ٠٠ أنا عمرى ماشفت الريح
بالشكل ده ٠٠ كانت قوية وعنيدة ٠٠ أنا كنت حاسس انها
بتحاربني أنا ٠٠ انها واقفة ضدى ٠٠ انها عاوزة تمنعنى من
أداء واجبى ٠٠

(الريح تعوى) ٠٠

الشيخ محمد : الخماسين

جمال : خدنا وقت طويل لحد متعرفنا على اللي جوه القبر ٠٠ ساعة
بعيننا وساعة بأيدينا ٠٠ لكن أنا ممشيتش من هناك الا لما
تأكدت أنه مفيش جثث ٠٠ وأنت المسئول ٠٠

الشيخ محمد : عن الخماسين اللي مش سايبه البلد والا على أيه ؟

جمال : ياشيخ محمد ٠٠ أنا بكلمك عن سرقة الجثث ٠٠

الشيخ محمد : بقى يا جمال بيه تروح القبر وتنبيهه متلاقيش اللي أنت
عاوزه أبقى أنا مسئول ٠٠ تتسرق سريقة أبقى أنا مسئول ٠٠
الخماسين تقلع الزرع وتحرق البيوت أبقى أنا مسئول ٠٠ دي
مسئوليات أكبر من وظيفتى ٠٠ ده حمل ثقيل يا جمال بيه ٠٠
بقى أنت حفرت ملقيتش جثة هنية ولا أمها (يضحك) طب
قول كلام غير كده ٠٠

جمال : بتضحك ياشيخ البلد .. حاضر أنا حوريك شغلك ..

الشيخ محمد : ألزم حدودك ياجمال بيه ..

جمال : خلاص .. أنا مش جهدا الا لما ارفدك .. أنا خلاص مقتنع
تماما انك أنت القوة الكبيرة اللي واقفة ضد القانون في البلد
دى ..

الشيخ محمد : حترجع تانى لحكاية القانون ..

جمال : أنا بلغت الأمور ومدير الأمن عنك أنت لازم تتوقف عن العمل
فورا اذا كنا عايزين للنجع ده خير ..

الشيخ محمد : رجعنا للتهديد ياجمال بيه .. أنا مستقيل .. أيود
حستقيل خالص .. ومش أنت السبب .. مش أنت السبب ..
حاجات تانى في دماغى .. أنا مش قادر استحمل مصاييب
الشغلة دى .. وأنا عاوزك تعرف ان لقيت الجثة ولاملقيتهاش
عملك ده قانونى ولا غير قانونى اللي بتعمله ده غلط .. غلط
ويشوه صورتنا في البلد دى ياجمال بيه ..

جمال : ألزم حدودك أنت ياشيخ البلد .. أنت مش حستقيل أنت
حتترقد أنت متصور أنك تقدر تحكم على عمل بانه صح والا
غلط .. لا مش أنت .. بالتأكيد مش أنت .. أنا هنا بحقق
القانون في النجع ده والبلد دى كلها .. القانون لازم يمشى
وأنت واقف ضد القانون .. وأنا بقول لك أنت هنا عدو
القانون ..

(الخماسين تزمجر في الخارج)

الشيخ محمد : كلامك ده أصعب على من رياح الخماسين .. لكن
أنا مش حاخده جد لسبب واحد لأنك متعودتش تكلم مشايخ

بلد محترمين انت تعودت تكلم مشايخ بلد من اللى يتاكل حقوق
بلدها وأهاليها ٠٠ انما أنا لا ٠٠ لا يا جمال بيه وحقوقها لك
للمرة الثانية ٠٠ أنا شيخ البلد دى مش بالوظيفة الجري ٠٠
أنا شيخها لأنى بحبها لأنى قلبى عليها ٠٠ لأنى راجلها ٠٠
ولأنك متعرفش ده أنا مش واخذ كلامك جد واذا كنت بتعتبرنى
فى نظرك عدو القانون فأنا بقول لك أنا عدو قانون ٠٠ (الريح
تزداد عنفا) اللى يحفر قبور الناس ويفضحها من غير دليل
غير الشك ٠٠ أنت بتحكم ع الناس بالموت بتدفعهم بالحيا ٠٠
أنا قلت لك بلاش حكاية نيش القبور ٠٠ بلاش ٠٠

جمال : أنا شفت مشايخ كثير ٠٠ الحاجة الوحيدة اللى يتميز بيها
عنهم ٠٠ لسانك ٠٠ لسانك يا شيخ محمد ٠٠ بيقدر يقلب
الحقايق كلها ويغيرها ويخدع أى انسان ٠٠ لكن ده مش
حيغير م الحقيقة حاجة ٠٠ أنت مسئول عن جثة هنية ٠٠ وقل
لى وديتها فين ٠٠ ؟

الشيخ محمد : وديتها فين ٠٠ ؟ غريبة يعنى أنا خدت الجثة ٠٠
جمال : امبارح أنت كنت فى الجبانة ٠٠

الشيخ محمد : ده أنت امبارح قابض عليه ٠٠ ماكنش فيه جثة ٠٠
ولا كفن يا جمال بيه أنا مش فاهمك ٠٠ ده تحقيق ؟ ٠٠

جمال : أيوه تحقيق ٠٠

الشيخ محمد : الطريق اللى انت ماشى فيه مش حيوصلك لى حاجه
٠٠ ده طريق مسدود وعلى كل احنا معدش لينا تفاهم مع بعض
واذا كان فيه تفاهم والا تحقيق نخليه مع الأمور ٠٠

(الريح تموى)

أنا خارج ٠٠

العسكري : يا أفندم فيه واحد اسمه خليل عاوز يشوف سعادته ..

جمال : خليه يدخل ..

(الشيخ محمد يقف مكانه فيدخل خليل ويتواجهان)

الشيخ محمد : هدى يا خليل .. هدى .. هدى أمال ..

خليل : اهنا ؟ !!

جمال : أنت ياراجل أنت .. ودبت جثة بنتك فين ؟

خليل : أنا ودبت جثة بنتى فين ؟ ليه مش انتو خدتوها .. ليه
يا حكومة عاوزين تعملوا فيها ايه ؟

جمال : أنت ودبت الجثة فين ؟

الشيخ محمد : بعد اذنك يا جمال بيه سيبني اكلمه .. همن دوروا
على جثة هنية فى القبر لا لقيوها ولا لقيو جثة أمها ..

خليل : ايه ؟ جثة هنية وأمها ضاعت .. وتضيع ليه ؟

جمال : بتسألنى أنا ؟ !!

خليل : آه .. أنت اللي حفرت القبر .. وبتحفر القبر ليه .. ؟

جمال : ياراجل أنت بتستعبط عامل نفسك مش عارف .. غريبة ناس
البلد دى لؤمه بشكل .. لكن حمرف ازاي اخليك تحترموا
القانون ..

الشيخ محمد : يا جمال بيه الراجل مخدش جثة .. ومفيش داعى
للكلام ع القانون دلوقت ..

جمال : لا فيه داعى للكلام فى القانون فى كل وقت .. (يوجه نظره

الى خليل (على كل حال ياراجل انتہ انا ماليش كلام معاك ..
انت حتتحول ع النيابة وهي اللي حتحقق معاك في الموضوع
ده .. ياشاويش عبد الستار ..

خليل : موضوع ايه ياشيخ محمد .. الفضايح ركباننا .. ركباننا ..
مش عاوزہ تسيبنا في حالنا حتى قبر هنية نبشوه ليه يا عالم ..
ليه ؟ اقتلونى .. اشنقونى .. بس بلاش فضايح ..

(يدخل الشاويش عبد الستار)

الشاويش : افندم

جمال : خد الراجل ده واعمل له اجراءات عرض ع النيابة ..
خليل : نيابة .. نيابة .. هيه النيابة حتخوفنا .. اللي بنخاف منه
حصل .. خلاص حصل ..

الشيخ محمد : انا رايع معاك النيابة يا خليل ..

(يخرج الشاويش ومعه خليل)

انا جاى وراكم ..

الشيخ محمد : انت موديه النيابة من قبل متأكد انه هوه والا انا
الى خد الجثة .. ماهو يا انا ياهوه ..

جمال : لا .. انتو لثنين ..

الشيخ محمد : اللي انت بتعمله ده كثير قوى .. وقاسى ع الراجل
ده وع النجع كله .. وممنوش فايدة .. الراجل مخدش جثة
بنته .. وبالعامل ده ممكن يتوجه لنا اتهامات كتيره .. ان

احنا بنهمل في المحافظة على جثث الموتى في البلد دى ٠٠ أيوه
٠٠ أنت فتحت القبر بدون حق ٠٠ والجثة بتقول انك مالقتهاش
يبقى مين خدها ٠٠ الراجل ياخذها ليه ؟ جايز فيه حرامية
بيسرقوا الجثث ٠٠ الحرامية اللي بيسرقوا جثث الموتى
ويبيعوها لطلبة كلية الطب ٠٠ جايز اتنقلوا هنا ٠٠ ماتنساش
ان عندنا كلية طب في أسسيوط ٠٠ وطلبة الطب في المحافظة
ماليين الدنيا ٠٠ واذا كان ده صحيح ٠٠ حتروح م الأهالى
فين ٠٠ يبقى مفيش حماية لجسادهم ٠٠ دول يهزوا الدنيا
ويكتبوا شكاوى تهز الحكومة من فوق ٠٠ فوق في مصر ٠٠
خللى بالك الحكاية مش سهلة حقق فيها زى ما أنت عاوز ٠٠
والقانون بتاعك خليه ينفعنا ٠٠ أيوه خليه يتحرك ويلاقى لها
حل ٠٠ أيوه القانون لازم يتحرك ميتحركش ليه ٠٠ على كل
أنا خارج رايح النيابة أشوف القانون حيعمل ايه مع خليل ؟
سلام عليكم أنا خارج ٠٠ (يستدير ليخرج ينظر اليه) القانون
٠٠ القانون ٠٠ أنا نفسى أشوفه ٠٠ شكله ايه القانون ده ٠٠
(يتجه نحو الباب) ٠٠

جمال : ياشيخ محمد ٠٠ وقف ٠٠

الشيخ محمد : (يستدير نحو جمال ويأخذ في تأمله)

جمال : أنت بتتريق ع القانون ياشيخ محمد القانون اللي من غيره
تعم الفوضى ٠٠ والكبير ياكل الصغير والحياة تبقى جحيم ٠٠

الشيخ محمد : اللي من غيره الحياة تبقى جحيم مش القانون ٠٠ لا
٠٠ دى العدالة ٠٠ فيه فرق كبير بين القانون والعدالة ٠٠
وأنا قلت لك قبل كده القانون أعمى ٠٠ ساعات يظلم ٠٠ انما
العدالة عمرها متظلم ٠٠

جمال : القانون هو العدل ..

الشيخ محمد : سيبنى يا جمال بيه أروح للنيابة بتاعتك .. أشوف
القوانين بتاعتكم حتعمل ايه للراجل الغلبان .. سيبنى يا جمال
بيه .. سيبنى أشوف القانون .. القانون اللى بيتحرك زى
ما أنتم عاوزين (يقترب من الباب) .. سيبنى

(يخرج) ..

جمال : القانون .. العدالة .. الراجل ده حيجننى غويط وحريص
.. ياترى الراجل د صادق .. والا مزيف .. جاد فى اللى بيقوله
والا بيحاورنى بكلامه المعسول .. الراجل ده غريب .. ممكن
يكون مؤمن بالكلام ده اللى بيقوله والا ده مجرد كلام عاوز
يخدعنى بيه .. خايف أقول كلامه بيهزنى من جوه ..
بيشككنى فى كل حاجة .. أيوه بيشككنى فى كل حاجة ...
ياترى فى دماغك ايه يا شيخ محمد أبو أحمد .. أنت مش
مخللينى أعرف ولا أفكر ولا اشتغل لكن أنا مش حسبيك تنتصر
على حتى لو هزيت دماغى كله .. أنا مش هستريح الا لما ..

(يرن جرس التليفون يرفع السماعه)

آلو .. آلو .. أيوه ٨٥٦٢٣٢ أيوه هيه دى النمرة اللى
طالبها فى مصر .. آلو مين نادية .. ؟ فىن ليلى .. ؟ راحت
امتى عند أبوها ؟ .. ليه .. هو مجدى عامل ايه ؟ ..
تعبان .. !! الدكتور قال ايه ؟ (تبدأ الرياح فى الهبوب)
ايه ؟ أنا حتصل بيهم هناك .. لا مش حقدر آجى دلوقت ..
أنا حتصل هناك .. ايه ؟ مش سامعه .. حتصل هناك مع
السلامة ..

(يزداد صوت الريح قوة)

الخماسين مش حتسيينا في حالنا ٠٠ انهارده هدت حيلي ٠٠
ومين عارف حتنتهي امتي ٠٠ ؟

(تضرب الرياح زجاج النافذة وتأخذ الأضواء في
الخفوت)

دي حتى أوضتي دخلتها الخماسين ٠٠

(تخفت الأضواء حتى تطفأ)

الخماسين طفت النور وخلت الأوضه ضلمه

أنا مش شايف ٠٠ مش شايف حاجه ٠٠

أيوه مش شايف حاجه ٠٠

الفصل الثالث

(تضاء الأنوار من الجزء الداخلى للمسرح وهو ينقسم الى قسمين :

الأول مضاء فى المقدمة وهو مندره فى بيت الشيخ محمد ابو احمد كما بدت فى الفصل الثانى المنظر الاول .

والقسم الثانى : مظلم فى مؤخره القسم الاول وهو حجره جلوس فى بيت خليل وهى تشبه مندره بيت عبد ربه التى ظهرت فى الفصل الثانى المنظر الاول .

الزمن بعد العشاء .. الخماسين مازالت تهب بصوت مسموع .. يظهر الشيخ محمد ابو احمد وهو يخلع جلبابه و زوجته تقف بجوار الباب) .

ام احمد : هيه الريح دى مش راضية تسكت ليه .. اهو من يوم
الريح دى ما هبت علينا واحنا لا عارفين نطبخ ولا نخبز
ولا نفسل .. مش عارفين نعمل حاجة .. ياترى امتى الريح
حتسكت يا ابو احمد ..

الشيخ محمد : (يخرج علبة الدخان من جيب صدريه ويأخذ في لف
سيجارته) ان شاء الله تسكت يا ام احمد .. ماهى لازم تسكت
في الآخر ..

(يحاول ان يشعل السيجارة يعلقا اكثر من عود كبريت ..
يترك السيجارة في يده من غير ان يشعلها) .

كل شىء وليه نهاية .. ايوه كل شىء وليه نهاية ..

ام احمد : اجيب لك عشا

الشيخ محمد : لا ماليش نفس .. هاتى لى اشرب ميه ..

ام احمد : (تتحرك نحو القلة) الناس كلها دخلت التلاجات الا
احنا ..

(تمسك بالقلة وتتحرك نحوه)

الشيخ محمد : تانى يا ام احمد

(يمسك منها القلة يشرب منها)

ام احمد : لا حسكت يا ابو احمد .. بس انت لازم تاكل .. تلاقيك
طول النهار قاعد على لحم بطنك ..

الشيخ محمد : قلت لك مش عاوز آكل .. هوه في جو الخماسين
ده .. ازاي الواحد تبقى له نفس ياكل ..

(الريح تهدأ يحاول أن يشعل السيجارة يأخذ نفساً
عميقاً)

أم أحمد : خبر ايه ياشيخ محمد ؟

الشيخ محمد : ايه فيه يا أم أحمد هو تحقيق بالليل وبالنهـار ..
روحي اعملي شاي ..

(يسمع طرق على الباب الخارجى .. يذهب ليفتح
الباب بينما تخرج أم أحمد)

أهلاً .. أهلاً .. حاج عبد الظاهر ..

الحاج عبد الظاهر : ازيك ياشيخ محمد .. ليك كام يوم مش باين ..
(تبدأ الريح في الهبوب)

الشيخ محمد : مشغوليات كتيرة يا حاج ..

الحاج عبد الظاهر : أهى الخماسين بدت تهب .. أهى عامله
عمايلها في البلد .. مش مخلية الناس في حالها ..

الشيخ محمد : شديدة قوى ..

الحاج عبد الظاهر : أيوه شديدة قوى الموسم ده .. متعانا نعمل
حاجات كتيرة ..

(الريح تهدأ)

أنا جاييلك في ..

الشيخ محمد : نجيب لك عشا يا حاج ؟

الحاج عبد الظاهر : اتمشيت من ساعة زمن .. انا جايلك في كلمة واحدة انا قابلت ودعمك عليان وهو زعلان قوى منك ..

الشيخ محمد : هو لحق يزعل .. ده الصبح كان هنا وانا قايل له البنت لسه صغيره ع الجواز وهي فعلا صغيره ع الجواز .. يزعل ليه .. ؟ لا ملهوش حق يزعل ..

الحاج عبد الظاهر : ماهو ده مهوش كلام ياشيخ محمد .. لا مهوش كلام .. انت عارف انها مش صغيره ..

الشيخ محمد : خبر ايه يا حاج .. اقول لك البنت صغيره تقول مهايـش صغيره .. ايه ده يا حاج .. اجيب لك شهادة ميلادها ..

(يخرج علبة السجاير)

الحاج عبد الظاهر : خبر ايه ياشيخ محمد .. صغيره .. وشهادة ميلادها .. طب قول كلام غير كده .. قول انك مش عاوز تجوزها ..

الشيخ محمد : انا اللي خبر ايه يا حاج عبد الظاهر ؟

اقول البت صغيره تقول مش صغيره .. طب انا مش عاوز اجوزها هه ..

(تدخل فوزية بالشاي)

فوزية : ازيك يا بابا الحاج

(ينقل ناظريه بين فوزية والشيخ محمد)

اهلا اهلا .. ماشاء الله .. ماشاء الله ..

(تقدم الفتاة صينية الشاي له ياخذ منها كوبا)

والله وكبرت يافوزية ٠٠ ماشاء الله ٠٠ ماشاء الله ٠٠

(تخرج فوزية)

دى اللى بتقول عليها صغيرة ٠٠ طب قول كلام غير كده ، دى
تماحك منك ياشيخ محمد ٠٠ وانا مش شايف لك حق ٠٠

الشيخ محمد : يا حاج متدنش حق فى بنتى ؟!

عبد الظاهر : لا مديكش دى بنتنا كلنا ٠٠ واحنا لينا فيها حق
معاك ٠٠ واحنا لينا فيها حق أكبر منك ٠٠

الشيخ محمد : طب سيبنى اشاور ٠٠

الحاج عبد الظاهر : تشاور مين ؟ ٠٠ ما احنا ولاد عمها ٠٠
والشورى شورتنا ٠٠

الشيخ محمد : اشاور نفسى ٠٠ يا أخى سيبنى اشاور نفسى ٠٠
(يأخذ فى لف سيجارة من علبة السجاير)

الحاج عبد الظاهر : شاور زى ما أنت عاوز فوزية لجابر ٠٠ وجابر
لفوزية ٠٠

(يضع كوب الشاي البارد على الصينية)

انا حسبيك دلوقت وحافوت عليك قريب ٠٠ السلام عليكم ٠٠

الشيخ محمد : متقعد ٠٠ خليك شوية ٠٠

الحاج عبد الظاهر : لا خلاص ٠٠ انا لازم امشى ٠٠

(يخرج ٠٠ وبعد خروجه تدخل ام احمد وهو يشعل
سيجارتته)

ام احمد : ياشيخ محمد ٠٠ البت فعلا كبرت ٠٠
(يسمع طرق على الباب فتخرج)

الشيخ محمد : مين ؟ عبد الستار .. أهلاً اتفضل ..
عبد الستار : مش حقد .. أنا لازم أمشي .. أنا جاي أقولك ان
حضرة الضابط عاوزك ..

الشيخ محمد : أنا جاي وراك ..
(يخرج عبد الستار ويقفل الباب وراءه .. فتدخل
أم أحمد)

أم أحمد : أنت خارج دلوقتي .. هو لا ليل ولا نهار .. يسيبوك
في حالك .. يسيبوك لينا .. ما احنا لينا حق فيك .. برضه
ياشيخ محمد ..

الشيخ محمد : ما هو طول عمرى وأنا كده .. وعمرى ماتت ..
ايه الحكاية يا بنت الناس ؟ ..

أم أحمد : أنا عاوزة أكلك كلمتين ..
(تأخذ الريح في الهبوب بقوة)

الشيخ محمد : قولى

أم أحمد : مينفعش وأنت مستعجل .. أنا عاوزة أكلك في بنتنا ..
في ولدنا .. ومش عارفه امتى الاقى وقت أكلك ..

الشيخ محمد : أهي الخماسين بتزيد

(يطرق الباب)

هانت يا أم أحمد .. هانت

(يذهب ليفتح الباب)

أم أحمد : (وهى تخرج) كل يوم بنقول هانت .. كل يوم ..

الشيخ محمد : (وهو يفتح الباب) حاضر .. حاضر .. لما ارجع

(يفتح الباب فيجد عبد ربه امامه)

اهلا عبد ربه .. اهلا .. اتفضل ادخل ..

(يدخل عبد ربه ويجلس على الكنبه)

الشيخ محمد : اهلا عبد ربه .. نجيب لك عشا ؟

عبد ربه : عشا ايه ياشيخ محمد .. الشاى يبقى كويس ..

الشيخ محمد : (يصب الشاى من الابريق) ..

الشاى لسته سخن ..

(يقدم كوب الشاى لعبد ربه)

اهلا .. اهلا ..

عبد ربه : اهلا شيخ محمد .. طبعاً أنت مستغرب زيارتى دى ..

الشيخ محمد : أبدا ده بيتك ومطرحك ..

(الريح تعوى)

أيوه الخماسين شديدة .. بتعوى زى الكلاب المسعورة ..

عبد ربه : خماسين ايه ياشيخ محمد ؟ أنا مش جاي اكلمك عن

حاجات زى كده .. ده أنا لفيت عليك البلد كلها .. حتى

المركز .. والنيابة وجيت البيت ثلاث أربع مرات علشان

أقابلك .. ولما أقابلك تكلمنى على الخماسين ..

(الريح يزداد عواؤها)

خماسين ايه دى ياشيخ محمد اللى نتكلم فيها ..

دى متهمنيش ٠٠ أنا اللي يهمنى انى اعرف مين قتل أخويا ؟
قل لى مين قتل أخوى ٠٠ ؟

الشيخ محمد : أسأل سؤال غير كده ٠٠

عبد ربه : هو ده سؤالى ٠٠ معنديش غيره ٠

الشيخ محمد : تصدقنى ولا متصدقنيش ٠٠

عبد ربه : لو مش حصدك ماكنتش جيت لحد عندك ٠٠ قل لى ٠٠
قول ٠٠

الشيخ محمد : مش حتصدق ٠٠

عبد ربه : ياشيخ محمد قول ٠٠

الشيخ محمد : جواب سؤالك مش عندى ٠٠

عبد ربه : أنت شيخ البلد ٠٠ والمفروض انك عارف القاتل ٠٠

الشيخ محمد : أنا يا عبد ربه لا أنا ولا الناس عارفه مين قتل
عليوه ٠٠ ؟ لكن كلنا عارفين هو اتقتل ليه ٠٠ ؟

عبد ربه : أنا ميهمنيش انى اعرف أخويا اتقتل ليه ٠٠ قلت لك قبل
كده ٠٠ مفيش سبب فى الدنيا يدى الحق لحد انه يقتل أخوى
٠٠ لو فيه سبب واحد يقنعنى ٠٠ كنت أسأل عنه ٠٠ لكن أنا
عاوز أعرف القاتل ٠٠ بس ٠٠ مش أسباب ٠٠ دى
متهمنيش ٠٠

الشيخ محمد : فى الحالة بتاعتنا ٠٠ أنت لازم تبحث عن سبب القتل
٠٠ وجايز يدلك ع القاتل ٠٠

(الريح تعوى) ٠٠

أهى الريح بتعوى تانى زى الديابة المسعورة ٠٠

عبد ربه : طب قل لى ايه علاقة هنية بقتل أخوى ..

الشيخ محمد : مفيش علاقة مباشرة ..

عبد ربه : يعنى ايه ؟ أنت بتلغز ياشيخ محمد ..

الشيخ محمد : لا بلغز ولا حاجه ..

عبد ربه : ضابط المباحث خرج جثتها ليه .. ؟

الشيخ محمد : تبقى عاوز تعرف سبب قتل أخوك .. ؟

عبد ربه : أنا قلقان قوى ياشيخ محمد .. ريعنى .. فيه حاجات كتير لازم تقولها لى .. ايه علاقة هنية بقتل أخوى ؟ .. أنا قبل ماجى هنا كنت عاوز أعرف مين القاتل .. مين الللى قتل أخويا أنا لسه عاوز أعرف مين قتله .. ؟ لكن برضه عاوز أعرف ايه العلاقة بين موت هنية وقتل عليوه .. ؟ ياترى هنية ماتت ميتة ربنا والا اتقتلت .. أنا حاسس انه فيه حاجات مقفولة على مش قادر أعرفها .. الناس مش عايزه تقولها .. مش عاوزه تتكلم .. اتكلم أنت وريحنى ..

الشيخ محمد : بجد عاوز تعرف ..

عبد ربه : (يركز نظراته عليه)

الشيخ محمد : (يخرج علبة سجائره ويأخذ فى لف سيجارة) .. يعنى أنت عاوز تعرف .. تعرف بجد (يصمت لحظة) .. والله ما أنا عارف أقول ايه ؟ .. أنا كل ما أفكر فى هنية .. تضعيع صورتها وتفضّل صورة بنتى فوزية .. أنت مخلف ومعاك ولدين ومعاك سعديّة ربنا يخليهم ليه .. شايف بنتك سعديّة دى أهى تمام فى سن هنية بس ياولداه هنية كانت حلوة .. قمره .. تقول للشمس قومى وأنا أقعد مطرحك ..

عبد ربه : (مثالا) ياشيخ محمد ايه علاقة هنية بأخوى ؟

قول ٠٠ قول وخلصنى ٠٠ قول واختصر وهات م الآخر ٠٠
الشيخ محمد : م الآخر ٠٠ م الأول ٠٠ أنت تسمعنى ٠٠ اسمعنى
كويس ٠٠ أنا بقول لك أنا نسيت هنية ٠٠ وشايف بنتى ٠٠
أنت لازم تسمعنى كويس ٠٠

(الخماسين يرتفع صوتها فى الخارج)

ريح الخماسين زادت ٠٠ احنا مشفناش سنة زى دى ٠٠ سنة
كثيية ٠٠ كلها عفار ٠٠ وأخوك عليه كان ريح خماسين
جايبه الكآبة فى كل مكان تروح فيه ٠٠ فى كل مكان يحل فيه
بيجى معاه العفار والتراب والوسخ ٠٠ أقول لك ايه يا عبد ربه
٠٠ م الأول ٠٠ م الآخر ٠٠ اهو كله عفار وتراب ، وسخ ٠٠

عبد ربه : أنت بتزود المي ٠٠ بتزود حزننى ٠٠ بتدق مسامير فى قلبى
(الريح يرتفع صوتها)

بتهننى زى رياح الخماسين مابتهدز نخلة ٠٠ كلامك بيعفر
عينيه ومش قادر أشوف ٠٠

الشيخ محمد : (يشعل السيجارة) ولسه عاوز تعرف ٠٠

(الريح تزداد عواء)

عبد ربه : ده أنا لازم أعرف ٠٠ أنا عبد ربه أبو حسين عمرى
ماعرفت الخوف ٠٠

الشيخ محمد : الراجل شواف وعراف وخواف ٠٠

عبد ربه : أنا شواف وعراف انما خوف لا ٠٠ قل لى أنت ٠٠ أخاف
من مين ٠٠ مين اللى ممكن يخوف ٠٠ ؟

الشيخ محمد : الحقيقة ..

عبد ربه : ودى تخوفنى ليه ؟

الشيخ محمد : اذا كانت الحقيقة متخوفكش .. يبقى ايه لزوم الكلام ..

عبد ربه : لانى لازم اعرف .. ولازم تقول ..

الشيخ محمد : انا حقول لك .. ولازم اقول لك ..

(الريح تزداد عواء)

والله ما انا عارف ابتدى بيايه .. انا كل ما أفكر فى الموضوع ده دماغى يتلخبط وأدى الريح يتعوى زى الضبايع الجعانة ..
الريح .. الخماسين .. انا كل ما أفكر فيها تضيع صورتها وتفضل صورة بنتى .. فوزية كبرت .. والخطاب جوها ..
هنية كبرت والخطاب جوها .. كل بنت لما تكبر الخطاب يطلبوها .. لذن فوزية ست البنات بيحبها اكثر من عريس فى اليوم .. هنيه كانت بت !! على أرض نجعنا مافيش بت فى جمالها .. الخطاب جوها .. أبوها خايل أبو حسين مدى كلمة لابن أخوه حسين .. العيال كانوا مخطوبين لبعض من الصغر .. الراجل رده بكلمة طيبة لكن الأيام كانت غدارة ع الراجل .. أخوك بعد ما طرق الباب دخل م الشباك ..
البنت صغيرة وأخوك جن عفريت .. ماسبش البت فى حالها ولا البيت فى حالة .. وفى يوم زى ده كان قبل الخماسين متهب هبتها اللى عمرنا ماشقنا زينا .. سمعت، خبط شديد ع الباب كانت الساعة متأخرة بالليل .. الخبط زاد زى واحد عاوز يكسر الباب ..

(تفتح الانوار على الحجرة المظلمة المواجهة لحجرة الشيخ

محمد دون أن تطفأ الانوار من حجرة الشيخ محمد يتراجع

عبد ربه قليلا ليقف بعيدا عن الشيخ محمد . مجاورا للحائط
وستارة المسرح اليمنى) .

لسه فاكّر اللحظة دى مش ناسيها .. ومش حنساها أبدا ..
الطرق بيزيد .. أنا حسيت أن الباب حيثكسر .. جريت ع
الباب بسرعة أفتحه ..

(هنا يكون الطريق قد تحول الى الحجرة الثانية المساءة
حديثا يتحرك نحو باب هذه الغرفة يفتح الباب فإذا به أمام
خليل أبو حسين) .

مين .. ؟ خليل أبو حسين .. أهلا .. أهلا ياراجل ..
اتفضل ادخل ..

(مازال خليل واقفا يبدو على وجهه الارهاق والقلق
والغضب) ..

الشيخ محمد : ادخل يا خليل .. ادخل حتوقف بره والا أيه ؟

خليل : (يدخل) ياشيخ محمد .. الحقنى .. ياشيخ الحقنا ..
عمتى اتمرغت فى الطين .. اتمرغت خلاص ياشيخ محمد
عملها الكلب عملها عليوه ده كان زى ابنى .. أنا مربيه
.. دخل البيت وحط كل وسخ الدنيا فيه .. البت حامل ..
حامل .. عارف يعنى ايه حامل .. أمها مريضة ومقدرتش
تحكم أمورها فى غيبتي تم ده ومعرفناش الا لما البطن كبرت .

الشيخ محمد : هدى .. هدى ..

خليل : اهدا ازاي .. اهدا ازاي .. أنا فكرت اقتلها .. رحى
الأوضة ، وقفت قصاى مستسلمة تقول لى بابا اقتلنى وخلص
عارك منى اقتلنى .. حطيت ايدى على رقبته .. جيت أدوس
مقدرتش .. مقدرتش .. ادى خانتنى هنية دى بنتى الوحيدة

.. ولدت على ايدي .. وكبرت على ايدي .. كانت حبة
قلبي .. كانت نور عيني .. دلوقت يبقى في بطنها ولد حرام
.. ولد يبقى ولد حرام كان نفسى أجوزها لحسن ابن أخويا
.. كنت عاوز أشوف ولادها عاوز أشوف ابن منها يقول لى
ياجسدى .. الابن اللى مجبتهوش تجيبهولى هنية ..
مرضيتش أتجوز تانى على أمها المريضة .. علشان هنية
متكسرشى .. أنا كنت دلوقت ماسك في رقبتها علشان أقتلها
.. مقدرتش مقدرتش .. مقدرتش ياشيخ محمد .. (يجلس
على الكتبة ويضع يده على عينيه ويجيش في بكاء عميق) ..

الشيخ محمد : اهدا يا خليل اهدا .. اهدا ياراجل ..

خليل : (يرفع رأسه) .. راجل .. راجل ايه ؟ أنا عمري ما حعرف
أرفع راسي في البلد دي تانى .. أنا مقدرتش أقتل بنتي ..
لكن أنا لازم أقتل الكلب اللى خدع البت الصغيرة .. لازم
أقتله ..

الشيخ محمد : هو ده حل يا خليل .. تقتل تروح السجن .. ويبقى
ما استفدناش حاجه ..

خليل : اتسجن .. أموت .. أتشنق .. اروح في ستين داهية أنا
متلخبط ياشيخ محمد .. أنا لازم أقتله بطوريه ..

الشيخ محمد : المسألة بسيطة يا خليل اللى مرضيتش بيه من قبله ..
ترضى بيه دلوقت .. نجوزها له .. وأهى الفضيحة تتكتم
ويادار مادخلك شر ..

خليل : آه ياشيخ محمد عليه ده ندل .. وأنا لازم أقتله ..

الشيخ محمد : اهدا .. اهدا .. دلوقت وأنا حلها لك بس اهدا
.. انت ..

(يتحرك الشيخ محمد نحو عبد ربه بينما تطلق الأنوار
من العجوة . وتظل الفسحة بين الحجرتين مضيئة) .

(يتحرك من مكانه ويقترّب من الشيخ محمد)

عبد ربه : ومجوزتها لوش ليه يا شيخ محمد .. ؟ ليه مجوزتها لوش
البيت ؟

(الخماسين تزداد عواء)

الشيخ محمد : (لا يرد عليه ويكلم نفسه) الخماسين السنة دي مش
زى عوايدها .. شديدة قوية .. بتقتل الزرع وتقطع الزرية
الخماسين مش عوايدها .. طولت .. طولت وجابت لنا
الكرب والكره .. كان أول يوم في الخماسين .. لأ كانت أول
ساعة فيها .. خرجت أقابله ..

(يترك الشيخ محمد عبد ربه الى الفراغ المملوء بين
الحجرتين يسلط عليه الضوء وقد وقف عليه بجانبه .. شاب
في العشرين من عمره .. بينما يتراجع عبد ربه الى مكانه قرب
الحائط دند طرف الستارة الأيمن) .

عليوه : أيوه يا عم الشيخ محمد ..

(يزداد هبوب الخماسين .. يغطي الشيخ محمد وجهه
يسأله بينما يترك عليه وجه للريح) .

الخماسين بادية شديدة يا شيخ محمد ..

الشيخ محمد : شديدة قوى يا ولدى ..

عليوه : السنة اللي فاتت كانت ..

الشيخ محمد : سيبك م الخماسين .. وم السنة اللي فاتت ..

عليوه : خير يا عم الشيخ ..

الشيخ محمد : شوف يا ولدى .. غلطتك لازم تصلحها ..

عليوه : غلطة ايه .. !!؟

الشيخ محمد : أيوه .. أنت غلطاتك كتير .. مش عارف أنهى واحدة فيهم ..

عليوه : أنا مش فاهم حاجة

الشيخ محمد : ربنا يفهمك بحق النبي وآل بيته .. وحق سيدي عبد الرحيم وأبو الحجاج .. أيوه يا بنى أنا بكلمك فى هنية .. لها البت حامل لها يا عليوه .. دانلى فى بطنها ولدك .. لها يا بنى ..

عليوه : ايه الكلام اللى بتقوله يا بابا محمد ..

الشيخ محمد : بو لما يشتدك .. ايه الكلام اللى بتقوله .. ؟ مش عارفه يالئيم ..

عليوه : تهم .. دى تهم باطلة يا بابا الشيخ .. متصدقهاش ..

الشيخ محمد : يا بنى اسمع .. دى أعراض ناس متلعيش بيها .. وكفاية كده متدفنن الناس بالحيا ..

عليوه : دى تهم باطلة يا عم الشيخ ..

الشيخ محمد : يا بنى اسمع أنت مش خطبتها قبل كده ..

عليوه : لكن متلزمينش دلقيت .. أنا مناسـبش ناس زى دول معروفش يربوا بنتهم .. وأنا ايش عرفنى ان اللى فى بطنها ده يبقى ابنى .. مش جازى يكون ابن حد تانى .. دول ناس بيرموا بلاهم على غيرهم ..

الشيخ محمد : (يرغع عصاه الخيزران على عليوه ويهم بضربه)
ياكلب ..

(يتلقى عليوه الضربة الاولى ويعتمد عنه فلا تصل اليه
الثانية ويأخذ في الجرى مبتعدا بجرى الشيخ محمد خلفه حتى
يفيق عنه) .

الأمر ده مش حسكت عليه أبدا ..

(يعود الشيخ الى حجرته .. يقترب منه عبد ربه ..
وقد أصبح الفراغ المضيء جزءا من المنظر)

عبد ربه : ده مش ممكن يكون أخوى ..

الشيخ محمد : ده أخوك 'اللى ..

عبد ربه : قول حاجة تانى .. حاجه غير كده ياشيخ محمد .. قول
أى حاجة .. ده مش ممكن يكون أخوى ..

الشيخ محمد : أيوه هو ده أخوك 'اللى عاوز تقتل عشانه خمسين ..
أيوه عاوز تقتل خمسين ..

(يزداد صوت الخماسين قوة)

عبد ربه : مش ممكن ..

(يزداد صوت الخماسين قوة ويصبح جزءا من صوته
وصوت الشيخ محمد)

مش ممكن .. مش ممكن ده يكون عليوه

الشيخ محمد : الخماسين بتوقع الشجر .. وتهد البيوت .. البيوت
التعبانه تقع .. وبيوت الحجر ما تنخلع لها طوبه ..
الخماسين السنة دى ماتتحملاش الا الجبال لكن هم خليل

مانتحمّلوش لا رمال ولا جبال .. أنا كل ما أفكر في خليل أفكر
في هنية وكل ما أفكر في هنية أفكر في فوزية .. صورة هنية
تضيق .. وتبقى صورة فوزية قدامى .. تصور لو فوزية
جرالها اللي جرى لهنية .. أعوذ بالله .. حتى التصور صعب
.. أسأل نفسي ياترى كنت أقتلها .. أقتل فوزية .. فوزية
اللي عمرى ماحبيت حد زى ماحبيتها أقتلها .. ده أنا حبيت
أمها عشانها .. أنا حبيت نفسي عشانها .. أقوم الأقيها بين
يوم وليلة حامل في ابن حرام من عيل ميسواش .. شايف
نفسه زى عليوه ..

(الخماسين تعوى تهز البيت)

عبد ربه : كفاية .. كفاية .. مش دى الحقيقة .. كفاية ..
الشيخ محمد : هيه دى الحقيقة .. أذت خايف م الحقيقة .. خايف
هنية تكون بنتك سعدية .. لا أكثر من كده ..

عبد ربه : كفاية .. مش ممكن ده يكون أخويا اللي بيعمل كده ..
كفاية ..

الشيخ محمد : لا مش كفاية .. ياترى لو كانت سعدية كنت تعمل
ايه ؟

عبد ربه : كفاية .. كفاية ..

الشيخ محمد : لا مش كفاية .. الخماسين بتزأ زى الأسود
الجمانه .. خليها تزأ .. خليها تقلع الشجر وتهد البيوت
أيوه .. تقلع الشجر وتهد البيوت .. لكن فوزية ميحصلهاش
اللي حصل لهنية .. لا .. لا .. لا ..

(نضاء الحجرة المظلمة والمواجهة لحجته مرة ثانية يتراجع
الشيخ محمد وعبد ربه الى الركن الأيمن للمسرح بجوار الستاره

بينما تظهر القابلة زهيرة واقفة ممسكة بهنية وهي راكدة في حالة
وضع صورتها هي نفس صورة فوزية .. تبدو مجهدة من
الأم) ..

يا خالة زهيرة أنا حموت .. حموت ياخالة زهيرة ..

زهيرة : استحملي يا هنية .. يابنتي .. استحملي .. مترفعيش
صوتك الجيران يسمعوننا ..

هنية : حاموت ياخالة زهيرة حاموت .. آه .. آه ..

زهيرة : خلاص .. خلاص .. استحملي شوية .. استحملي
يابنتي .. الله يجازي ولاد الحرام .. الله يجازي اللي كان
السبب ..

(ندخل أم هنية امرأة مريضة تلبس السواد وتتوكأ على
عكاز وقد بدا عليها اجهاد المرض .

الأم : آه يابنتي آه ..

(تقترب من ابنتها)

استحملي يابنتي ..

هنية : آه .. آه .. حموت ..

(تعلقو صرخاتها يدخل الأب خليل أبو حسين حائرا لا يدري
ما يصنع) ..

آه .. آه .. حموت يا بابا ..

خليل : آه .. آه .. ياشرفي ..

(يضرب بيديه على رأسه)

آه يابنتي آه ..

هنية : آه .. آه .. آه (يتوقف الصوت)

زهيرة : خلاص .. خلاص .. طلع ..

(يسمع صرخة طفل مرة واحدة ثم تصمت الصرخة) .

ولد .. بس ميت .. (تلفه في جلاباب والأب في زهول)

الأم : (تصرخ) ماتت .. ماتت .. ماتت (تحرك ابنتها) .. هنية ماتت

يا خليل .. هنية ماتت .. (تسقط الأم مغمى عليها) ..

خليل : مقتربا من ابنته (بنتى .. بنتى .. هنية .. هنية .. ماتت

.. ماتت ..) يحتضنها يرفعها بين يديه (ماتت .. ماتت ..

(يضعها على السرير يحمل طفلها يضعه بجوار أمه .. بينما

يتحرك الشيخ محمد نحوه وهو يصرخ)

الشيخ محمد : فوزية .. فوزية .. فوزية ماتت ..

(يمسك بفوزية)

اصحى يافوزية جيت ولد .. ولد .. اصحى يافوزية .. أوغى

تموتى .. جيت ولد .. اصحى .. ولد يافوزية ..

(يرتفع صراخه بينما تطفأ الأنوار وتختفى الأم والفتاة

والفتاة وابنتها يتبعهما خليل ويبقى الشيخ محمد مكانه يتحرك

عبد ربه نحوه مسرعا فيماد الضوء الى الحجرة لتصبح الحجرتان

معا هي واجهة المسرح) .

الشيخ محمد : (محتضنا المخدة) فوزية ماتت .. فوزية ماتت ..

ماتت .. ماتت ..

(الريح تزداد عواء)

عبد ربه : كفاية ياشيخ محمد .. كفاية .. قوم على حيلك .. قوم ..
الشيخ محمد : (وقد ظهر عليه الاجهاد يجلس على الكتبة صامتا ثم
يخرج علبة سجائره ليلف منها سيجارة وقد بدا عليه سكون
عميق) ..

أنا نسيت نفسي يا عبد ربه .. نسيت نفسي .. أنا قلت لك
ان هنية بتفكرنى بفوزية دايمًا .. أنا عمرى ماشفت هنية الا
انها فوزية ..

عبد ربه : خلاص ياشيخ محمد .. خلاص .. خلاص ..
(الخماسين تهب صوتها كأنه حفيف)

الخماسين بتبخ السسم .. وبترميه جواى نازل ع القلب ...
بيسرى فى دمي .. أنا التالت فيهم .. الخماسين فى بتغرز
أنيابها .. لو حيه شايفها أقتلها ..

(يرتفع صوت الخماسين)

الخماسين بتزأر .. أسد ريحة الدم فى حنكه .. لو شايفه
اكسر حنكه نصين اجزره وأرمى لحمه للديابة السعرائة ..
أنيابه غارزه فيه .. دوافره ماسكة فى القلب .. آه .. آه ..
أول مرة أقولها .. الخوف دب فى مفاصلى .. الريح دب
فى مفاصلى .. دب .. دب ..

(بهدوء ساكن) .. هو خليل قتله ؟

الشيخ محمد : (يشعل السيجارة) لا يا عبد ربه ..

عبد ربه : متفرقش كثير قتله والا مقتلهوش ..

الشيخ محمد : لا يا عبد ربه .. خليل كان موجود معي ..
وكان فيه أكثر من واحد معانا يومها .. خليل مارحش السبق
ولا كرى عليه حد يقتله .. عليوه كان أشد ع الناس م
الخماسين اذى ناس كتير في شرفها .. في عرضها يا عبد ربه
.. فيه ناس كتير يهملها تقتله .. لو عديت لك اللي عندهم دافع
لقتله يطلعوا أكثر من خمسين .. لا أكثر .. يمكن أكثر من
مبه .. أخوك كان مستعفى بنفسه .. متصور نفسه فحل
جاموس ينطح أى شرف يقابله .. تحب أعد لك .. كان لوحده
خماسين في كل بيت دخله .. كان أشد على الناس منها ..
تحب أعد لك ..

عبد ربه : خلاص .. خلاص .. ياشيخ محمد .. كفاية كده مش
عاوز أعرف مين قتله .. أى حقيقة خاصة بعليوه مش عاوز
اعرفها بس كان نفسى اللي قتل عليوه يصبر لحد ما آجى ..

الشيخ محمد : الناس خايفة منك ..

عبد ربه : خايفين منى !! مهم قتلوه .. كانوا لازم يستنوا لما اخرج
م السجن وأنا أقتله بايدي .. أيوه أقتله بايدي .. ده
موسخس شرف حد ده وسخ شرفنا .. آه .. عليوه يعمل
كده (يجلس) كان لازم أنا اللي أقتله مش حد تانى وإذا كان
فيه حد غيرى يقتله فيكون أنت .. والا خليل .. عليوه يعمل
كده .. في مين .. في خليل ياولداه .. همى أنا اللي تقيل
اتقل من همك يا خليل .. آه .. كام ما الحقيقة مره .. مره
قوى ..

(يقف ، يتجه نحو الباب وقد ظهر عليه الألم) ..

همى اتقل من همك يا خليل ..

الشيخ محمد : على فين ؟ استنى ..

عبد ربه : استنى ايه ياشيخ محمد بعد الفضايح دى .. انا ماشى
.. ماشى أروح ديواننا انصب العزا عليه .. هوه مايستهلش
منا البكا ولا العزا فيه .. لكن لازم الناس تعرف أن أخويا
ملهوش ديه .. انه مات فطيس .. لازم الناس تعرف أنا
راضيين عن قتله .. اللي قتل النفوس فى شرفها ميستهلش
ناخد بتاره .. ولا يتقتل فيه حد .. احنا قتلناه .. لأنه مرغ
عممنا فى التراب .. عليوه قتل نفسه أنا قتلته فى يوم ثلاث
والخماسين بتهب زى عوايدها ..

.. آه ياعليوه آه ..

والله ماتستاهل البكا .. الحقيقة مره فى حنكى ياشيخ محمد
(يفتح الباب ليخرج)

الشيخ محمد : أنا جاى وراك ..

(يقفل عبد ربه الباب وراءه)

فوزية كبرت ياولاد .. أيوه كبرت .. فوزية .. يافوزية ..
لا .. لامش ممكن يحصل لفوزية اللي حصل لهنية .. مش
ممكن .. مش ممكن ..

أم أحمد : (يسمع صوتها من الخارج) فوزية نامت (تدخل) عاوز
حاجة ..

الشيخ محمد : صح فوزية .. صحيها بسرعة .. عاوز أشوفها ..
عاوز أكلم معاها قبل ما أخرج ..

أم أحمد : تخرج فى الخماسين دى ..

الشيخ محمد : جايز تهذا شوية .. أيوه جايز تهذا .. روحى صحى
فوزية ..

أم أحمد تخرج

الشيخ محمد : (وقد ظهر عليه الهدوء الشديد وأخرج سيجارة أخذ
يلفها يجلس على الكذبة ثم يقف يكرر ذلك أكثر من مرة)
فوزية كبرت يا ولاد ..

أم أحمد : (تدخل) أنت بتناديني يا أبو أحمد

الشيخ محمد : فين فوزية ؟

أم أحمد : أمي جاية على طول .. أجيب لك العشا ..

الشيخ محمد : عشا ايه يا أم أحمد أنا حخرج اذا حد سأل عليه أنا
في جنازة عليوه ..

فوزية تأخرت ليه .. (يتوقف لحظة) الريح هديت وربنا
يسترها تكون دي نهاية الخماسين .. أيوه الخماسين طولت
.. وكفاية كده .. خلينا نعيش يومين من غير خماسين ..

أم أحمد : ربنا يسمع منك نعيش يومين من غير خماسين قبل ماتدفنا
في ترابها ..

فوزية : (من الخارج) أيوه يابا .. خدامتك يابا ..

الخماسين تبدأ الحركة خفيفة بينما تدخل فوزية ..
يتوقف الشيخ محمد مع حركة الخماسين (

الشيخ محمد : (يجرى نحو فوزية يحتضنها وهو يصرخ)

مش ممكن .. مش ممكن .. مش ممكن

تطفأ الأنوار



6
4
5



رقم الايداع ١٩٨٨/٢٣٩٦
الترقيم الدولى ٣ - ١٧٠١ - ٠١ - ٩٧٧

الهيئة المصرية العامة للكاتب